



廣東通志

ル 5  
1508  
6





門 凡 呂 6  
508

書

門 凡 5  
1508  
E



廣東通志卷之十二

潘省志十二

名宦二

漢逮六朝唐宋繼統宦籍多賢覆幬我粵唐於嶺  
 南置總管安撫經畧諸使監督則有黜陟觀察採  
 訪諸使振武則有都督節度招討諸使以邊省加  
 撫綏意甚微也時維宋璟李朝隱盧奐李尚隱李  
 勉盧鈞並稱六賢仁茲百粵宦業焜煌不可尚已  
 而李靖文武兼資畧定南服王琳清操特立表率



諸僚孔戣不邀近功交廣晏然其他一政一行之善者不可縷述也宋以忠厚立國隆禮臣工掃藩鎮積威之劫而重安撫經畧之任建牙列戟號稱帥府今雙闕之門猶存清海軍都督之舊一時委用類多名賢若潘美下廣州秋毫不犯魏瓘築郡城保鄣有功狄宣徽之安攘余襄公之撫輯楊旼之經制有方楊長孺之清廉繼美向敏中之不市南藥足風百世矣至如文天祥陸秀夫張世傑精忠偉節日月爭光其關於世運不小也故生有隆施歿有顯號懿好在人古今一揆因論次于篇庶以勸後之爲人臣者

**唐**李靖字藥師京兆三原人姿貌魁梧通書史嘗曰大丈夫當以功名顯何拘拘於章句儒爲耶唐武德初上圖蕭銑十策上使從李孝恭討平之封永康公檢校荊州刺史度嶺招慰酋領馮盎等皆以子弟來謁南方悉定承制補官得郡凡九十六戶六十餘萬詔書獎勵授嶺南撫慰大使檢校桂州總管以嶺嶠僻遠非震威武示禮義則無以變風俗即帥兵南巡



所過問疾苦延見長老宣布恩惠遠近悅服歷官中書門下平章事開府儀同三司二十二年病卒年七十九贈司徒謚曰景武

劉齡之彭城人唐武德中爲廣州都督表稱嶺南州縣僻在南服官其地者任情恣肆不顧憲章惟求潤屋其婚姻資需即稅人子女百姓怨苦數叛且都督刺史多居莊宅經旬月不一至府詞訟皆委判官勅詔施行者纔經省覽而已且首領娶部民女爲妻妾不限多少肆情侵奪民不堪命疏奏下詔禁斷蠻俗使之

馮立同州馮翊人有武藝畧涉書記貞觀初爲車騎將軍後以爲千牛衛將軍突厥犯便橋立引百餘騎與戰敗之咸陽帝喜拜廣州都督前後作牧者多黷貨爲蠻夷患由是數怨叛立不營求衣食取給而已常至會泉嘆曰此吳隱之所酌也一杯何足道哉吾日汲而飲能易吾性乎遂飲去在事數年甚有惠政卒于官

馮元常相州安陽人爲廣州都督詔便驛赴官安南



首領李嗣仙殺都護劉延祐劫州縣詔元常討之率士卒航海馳檄先示禍福賊黨多降元常遣兵斬其首惡衆乃降散卒爲酷吏周興所陷追赴都下獄死元常閨門雍睦有禮法雖小功喪不御私室神龍中旌其家署曰忠臣之門

唐臨字本德京兆長安人爲侍御史奉使嶺外按交州刺史李道彥等申理冤繫三千餘人永徽元年爲御史大夫威惠並著所撰眞報記二卷

王方慶名絀以字行雍州咸陽人永淳中累遷太僕少卿拜廣州都督南海歲有崑崙乘舶以珍物與中國交市舊都督路元獻冒取其貨崑崙懷刃殺之及方慶至任數載秋毫無所索外夷悅服又管内諸州首領舊多貪縱百姓有詣府稱冤者府官以先受首領叅餉未嘗鞫問方慶乃禁止府寮絕其交往首領縱暴者悉繩之由是境內清肅有唐以來治廣州者無出方慶之右制袞之曰朕以卿歷職著稱美化遠聞實副朝寄今賜卿雜綵六十段并瑞錦等物以彰善政累遷鸞臺侍御同鳳閣鸞臺平章事卒謚曰貞



方慶博學好著述所撰雜書凡二百卷尤精三禮子  
駿工書知名性嚴謹官至殿中侍御史

宋慶禮洛州永平人擢明經補衛尉武后朝遷大理  
評事使嶺南時崖振等五州首領更相攻掠民苦于  
兵使者至輒苦瘴癘莫敢往慶禮身到其境諭首領  
大誼皆釋讐相親州土以安罷戍卒五千歷監察御  
史以習識邊事爲度支管田使兼營州都督卒贈工  
部尚書慶禮爲政嚴而公吏不敢犯卒謚曰敬

宋璟邢州南和人舉進士耿介有大節好學工文辭

開元初爲御史大夫爲辯魏元忠之誣會有飛書告  
張昌宗者請窮究太后欲原之令詣璟謝璟不見曰  
公事公言之若私事法無私也後坐小累徙廣州都  
督廣人以竹茅茨屋多火璟教之陶瓦築堵自是鮮  
火患恩州苗帥作亂遣五府總管臨之以甲卒開諭  
以恩信革心降服夷落大寧召拜刑部尚書尋遷吏  
部兼侍中封廣平郡公廣人爲璟立遺愛頌璟上言  
頌所以傳德載功也臣治蹟不足紀廣人以臣當國  
故爲溢辭徒成諂諛宜釐正之請自臣始有詔許停



止樹張說所著碑終尚書右丞相致仕璟風度凝遠人莫涯其量始自廣州入朝帝遣內侍楊思勗驛迓竟不交一言思勗自以將軍貴幸訴之帝益嗟重唐稱賢相莫有過者開元末年卒贈太尉謚文貞裴仙先絳州聞喜人宰相炎從子蔭爲太僕丞炎請武后歸政被斥爲人誣告僂死仙先坐流嶺南中宗復位求炎後授仙先詹事丞開元中遷廣州都督廣故多貨仙先政務清簡廣人愛之謂宋璟之後一人云封翼城縣公卒年八十六

李朝隱字光國京兆三原人少以明法舉累授大理丞神龍中功臣敬暉桓彥範爲武三思所構諷待御史鄭愔奏請誅之勅大理詰其罪朝隱以所犯不經鞫實未可即正刑名忤旨貶嶺南惡地侍中韋巨源中書令李嶠奏曰朝隱素稱清正一朝遠徙嶺表恐天下疑其非罪中宗意解出爲聞喜令尋遷侍御史二十一年以御史大夫兼判廣州事軫恤民隱屢有建議公直廉潔輿論稱之明年卒於嶺外年七十贈吏部尚書官給靈輦兼家口給遞還鄉謚曰貞



宇文審京兆萬年人融之子擢進士第累遷大理評事楊國忠顯政殺嶺南流人以中使傳口勅行刑議者嫉其酷乃以審爲嶺南監法處置等使活者甚衆後轉和永二州刺史

李尚隱萬年人年二十舉明經神龍中擢左臺監察御史雪寃伸枉歷桂州都督玄宗知其忠公遣使勞之賜雜綵百疋自桂州遷廣州都督五府經畧使尚隱性剛亮與人披心示誠人多德之召爲御史大夫人共哀金以贈尚隱謝曰吾性不喜此物非畏人知

也時司農卿陳思問引小人爲屬吏乾沒錢穀尚隱按其贓累鉅萬流死嶺南尚隱卒謚曰貞

盧奐滑州靈昌人宰相懷慎子少爲吏以清白聞歷御史中丞出爲南海太守兼五府經畧節度使南海利兼水陸珍寶山積前守劉巨鱗彭杲皆坐贓鉅萬特授奐代之遐方之地貪吏歛迹中使市舶亦不敢干法邊俗咸安時謂自開元來廣州節度清白者宋璟李朝隱及奐三人而已詔加銀青光祿大夫三年入爲尚書右丞



李勉字玄卿長安人少喜學內沈雅外清整肅宗即位靈武擢監察御史糾劾武臣背闕喧嘩者帝嘆曰吾有勉朝廷始尊入爲京兆兼御史大夫尋爲嶺南節度使番禺賊馮崇道梁崇率等負險爲亂殘十餘州勉遣將李觀率容州刺史王翊討斬之五嶺遂平西南夷舶向歲至者纔四五譏視苛密故也勉旣廉潔又不暴征明年至者四百餘柁居官久未嘗收飭器用車服後召歸至石門盡搜家人所蓄犀珍投江中其介如此部民叩闕請立碑頌德代宗許之進工部尚書封汧國公德宗立加同平章事帝問曰衆言杞爲姦邪朕殊不覺其然勉對曰天下皆知而陛下獨不知此所以爲姦邪也卒年七十二贈太傅謚曰貞簡

路嗣恭京兆三原人始名劒客爲神烏姑臧二縣令考績爲天下最玄宗謂可嗣漢魯恭因賜名嗣恭歷工部尚書兼御史大夫靈州大都督府長史充關內副元帥大曆八年嶺南將哥舒晃殺節度使呂崇賁及五嶺騷擾詔加嗣恭兼嶺南節度觀察使嗣恭擢



流人孟瑤敬冕使分其務瑤主大軍當其衝冕自間道輕入招集義勇得八千人出其不意遂斬冕及誅其同惡萬餘人築爲京觀五嶺削平拜檢校兵部尚書嗣恭起于郡邑吏才勝其守所籍罪人貲財不以貢獻故代宗啣之賞不酬功云

徐申字維降京兆人擢進士第補秘書省正字遷潮州刺史進嶺南節度使前使歿後吏盜印署官職百餘員畏事泄謀作亂申覺擒首惡殺之群邪遂定遠俗以攻劫相矜申禁嚴切無敢犯者外蕃歲以珠璣瑁香文犀浮海至申於常貢外未嘗騰索商賈饒盈劉闢反表請發卒五千循馬援故道繇巒抵蜀擣闢不備詔加檢校禮部尚書封東海郡公卒贈太子少保謚曰平

張伯儀魏州人以戰功隸李光弼軍討平浙賊袁晁功第一擢睦州刺史後爲嶺南節度使伯儀朴厚不知書然能推誠委任軍府簡肅人皆使之卒贈揚州大都督謚曰恭

宗仲字義仲南陽人少有材畧安史之亂以戰功累



遷遊擊將軍廣德初宦官廣州市舶使呂太一發兵作亂節度使張體一作振棄城奔端州事聞詔以楊徽

爲御史中丞嶺南節度使仲叅其軍爲節度判官與江西觀察使李勉共討之犄角相援者三年仲潛軍間道克復廣州始通貢獻設大理寺少卿兼監察御史永泰元年奏捷如京師

杜佑字君卿京兆杜陵人以蔭歷戶部侍郎建中初遷御史大夫領廣州刺史嶺南節度使佑至廣爲開大衢疏析廛閭以息火災朱崖黎氏三世保險不賓

佑討平之召拜尚書右丞復相德宗年老以太保致仕元和七年卒贈太傅謚曰安簡佑政行兼脩而性嗜學雖貴猶夜分讀書元是劉秩爲政典二十五篇房瑄稱才過劉向佑以爲未盡因廣其闕參益新禮爲二百篇名曰通典奏之優詔獎美

李復字初陽隴西人以蔭爲江陵令累遷廣州刺史兼御史大夫嶺南節度觀察使會安南經畧使高正平張應相繼卒其叅佐偏裨李元度胡懷義等阻兵稱亂復誘懷義杖殺之奏流元度于荒裔又勸導



百姓變茅居爲瓦舍瓊州又陷於蠻徭復累遣使喻之遣兵勦其元惡奏置瓊州都督府撫綏其民疏言瓊州本隸廣府管內乾封年山洞反叛遂茲淪陷至今百有餘年臣令判官姜孟京崖州刺史張少逸併力討除竊以瓊州控壓賊洞請昇爲都督府加瓊崖振儋萬等五州招討遊奕使其崖州都督請停上從之遂教民陶瓦爲屋以免颶風之患復所至有德政士民頌之徵拜檢校尚書左僕射卒贈司空

楊於陵字達夫關西人年十八擢進士歷嶺南節度使辟常詞李翱等在幕府咨訪得失教民陶瓦易蒲屋以絕火患監軍許遂振者悍戾貪肆憚於陵不敢撓以私則爲飛語聞京師於陵罷歸遂振領留後事答吏剔抉其贓吏呼曰楊公尚拒他方賂遺肯私官錢邪宰相裴垪亦知其枉乃授吏部尚書而遂振終得罪於陵尋改戶部尚書其爲人節操堅明始終不失其正太和四年卒贈司空謚曰貞孝

趙昌字洪祚天水人始爲昭義節度李承昭府屬累遷虔州刺史安南會徭杜英翰叛都護高正平以憂



廣東通志 卷之二十一 三十五  
死拜昌安南都護夷落嚮化叛兵即定詔加昌檢校  
戶部尚書遷嶺南節度使降輯陬荒瓊管儋振安萬  
等六州洞俚來歸爲圖以獻往來鯨海撫安備至夷  
寇無復侵掠瓊人德之卒年八十五謚曰成

馬懿字元會扶風人元和中以虔州刺史遷安南都  
護廉靖不撓夷徭安之建二銅柱於漢故處劉著唐  
德以明伏波之裔嘗駐合浦甚有威惠歷遷嶺南節  
度使至南海即脩教令明賞罰磨洗姦慝百粵率服  
舉給事中穆質以自代入爲刑部侍郎進戶部尚書

卒贈右僕射謚曰懿

孔戣字君嚴魯國人孔子三十八世孫擢進士歷官  
左丞忤中官出爲華州刺史明州歲貢淡菜蚌蛤之  
屬戣以爲自海抵京師道路役凡四十三萬人奏罷  
之歷大理卿國子祭酒會嶺南節度使缺帝謂裴度  
曰嘗論罷蚌菜者誰歟今安在是可往爲朕求之度  
以戣對即拜嶺南節度使旣至免屬州逋負十八萬  
緡米八百斛黃金稅歲八百兩南方鬻口爲貨掠人  
爲奴婢戣峻爲之禁由是閭里相約不敢犯士之斥



南不能北歸與有罪之後百餘族才可用用之黃洞諸蠻叛久不平容桂二管利擄掠幸有功乃請合兵討之殲固言不可帝不聽後果無功安南乘之殺都護李象古而桂管裴行立容管陽旻皆以憂死獨殲不邀一旦功交廣晏然大治以禮部尚書致仕卒年七十三贈兵部尚書謚曰貞

鄭綱字文發鄭州滎陽人幼有奇志擢進士宏辭高第累遷嶺南節度使綱以儒術進守道寡欲所居不爲烜赫而持已廉平世以耆德推之以太子太傅致

仕卒年七十八明司空謚曰宣從子餘慶貞元末爲

宰相

鄭從謹字正求會昌二年進士及第累官廣州刺史嶺南節度使五管爲詔蠻所擾而林邑又復內侵夷獠焚然乃募土豪置其酋以右職而約束之禦侮扞城皆得其効交廣晏然僖宗立詔爲刑部尚書同平章事致仕卒謚文忠

李憲洮州臨潭人父晟事德宗有大功於社稷是爲西平忠武王憲於諸子中號最仁孝以禮法自持歷



太府卿遷嶺南節度使憲性明恕詳正大獄活無罪者數百人所至以吏能顯政績暴著崔護繼憲節度雖負重名而德威不及廣人益思憲云

盧鈞字子和范陽人元和四年進士擢第開成元年冬代李從易爲嶺南節度使南海有番舶之利珍貨輻輳舊帥者靡不捆載而還鈞性仁恕爲政廉潔奏請監軍領市舶使已一不干預蕃徭與華人錯居相婚嫁多占田營第舍吏或撓之則相挺爲亂鈞下令蕃華異處不得通婚非土人不得立田業由是闔部

肅然貞元後流放衣冠其子姓窮弱遇赦不能自還者鈞減俸錢爲營棺槨還葬有疾苦死喪則給醫藥殯殮孤兒幼女爲之婚聘凡數百家人服其德又除采金稅以甦民困三年將代華蠻數千人詣闕爲鈞請立生祠遷戶部尚書河東節度使人爲太子太師卒

崔珙博陵安平人父刺史頰有八子皆顯庸人比之漢荀氏八龍珙以書判拔萃高等官至太府卿拜廣州刺史兼嶺南節度使延英中謝帝問以撫理南海



之宜珙奏對明辯帝深嘉之會徐州承智興之後軍  
驕難制帝即以王茂元代珙鎮廣南授珙檢校工部  
尚書徐州刺史武宗即位拜同中書門下平章事與  
崔鉉不協貶恩州司馬今州西有丞相嶺蓋珙所嘗  
登眺處云

柳玘以明經補祕書正字由書判拔萃累轉左補闕  
歷轉嶺南節度使解中橘熟既食乃納直於官黃巢  
陷交廣逃還除起居郎巢入京師奔行在再遷中書  
舍人御史中丞昭宗欲倚以相中官譖玘煩碎非廊  
廟器乃止嘗述家訓以戒子孫可想其風致云

常正貫字公理京兆萬年人中書令南康忠武王臯  
弟平之子舉賢良方正異等除太子校書累擢嶺南  
節度使南海舶賈始至大帥必取象犀明珠上珍而  
售以下直正貫既至無所取吏咨其清南方風俗右  
鬼正貫毀淫祠教民無妄祈會海水溢人爭咎之貫  
登城沃酒以誓曰不當神意長人任其咎無逮下民  
俄而水去民乃信之居鎮三歲卒贈工部尚書  
李承勛營州柳城人祖臨淮武穆王光弼與郭子儀



戰功俱爲中興第一父彙涇源節度使承勛智勇出人思績祖烈歷嶺南節度使發鄰道兵討平王令寰奏捷至上歎曰朕幾失人初忠武軍精兵皆以黃冒首號黃頭軍承勛以百人定嶺南由是五管多效其服裝夷賊聞風而靡百粵汭康承勛倡之也詔加承勛檢校兵部尚書

韋宙京兆萬年人周大司空孝寬之後父丹觀察江西爲循吏第一帝問宰相周墀曰丹有子否墀以宙對即推蔭歷侍御史後遷嶺南節度使南詔陷交趾加宙尚書左僕射同中書門下平章事宙益嚴師旅招徠流移俚俗婚姻喪葬禁誨以禮嶺表種落莫不信悅咸通中卒宙弟岫字伯起亦有名岫在嶺南以從女妻小校劉知謙或諫止之宙曰吾子孫或當依之謙後以功爲封州刺史生二子即隱龔果開霸業韋氏之族賴以爲安

蕭倣字思道南蘭陵人太和元年擢進士累除給事中歷嶺南節度使倣性公廉南方珍賄叢夥月俸之外他物不以入門家人病醫須烏梅左右取於公厨



以和劑倣知命亟還之促買於市後遷司空封蘭陵  
縣侯卒子廩字富侯第進士遷尚書郎時領南海解  
官往侍南海多穀紙倣勅諸子繕殘書廩諫曰州距  
京師且萬里書成不可露齎必貯以囊笥貪者伺望  
得無薏苡嫌乎倣曰善吾思不及此乃止故濁亂之  
際克保令名

李迢隴西人宗室疎族素以剛正聞乾符中爲嶺南  
東道節度使黃巢寇起所至莫禦天平節度使張勳  
薨巢求代朝廷不許巢復上表求節度廣州上命大  
臣議之左僕射于琮以爲廣州市舶寶貨所聚豈令  
賊得之亦不許巢大怒詬執政急攻廣州即日陷之  
執迢使草表述其所懷迢曰予骨肉滿朝世受國恩  
腕可斷表不可草遂遇害

劉崇龜字子長滑州人績學能文進士擢第累遷起  
居舍人歷檢校戶部尚書出爲廣州刺史清海軍節  
度嶺南東道觀察處置等使有富商子泊舟江滸見  
岸上妙姬當門不避因挑之期夜相過是夕果啓扉  
待之商子未至有偷兒入姬悞就之遂爲所刺遺刀



而去商子後至踐其血仆地摸見死者急出解維而去明日其家隨血跡至江岸岸上人云夜有某客船徑發去矣官追獲拷掠備至其實吐之惟不招殺人視其刀乃屠家物崇龜下令曰某日演武饗軍合境庖丁悉赴宰殺既集復曰已晚留刀於厨明日再至陰以殺人之刀換其一詰旦各請刀獨一屠不認其刀因詰之對曰此非某刀乃某人之刀也命捕之則已竄矣崇龜以死囚代富商子侵夜斃於市竄者謂商子已受罪而歸家遂孺伏法仍治商子以夜入人家罪其臨政精明類此崇龜仕累華要及洺南海姻舊或干以財率不答但電荔枝圖與之第崇望相昭宗亦有名

鍾傳江西萬載人僖宗時討王仙芝有功歷官嶺南節度使時黃巢亂後州縣廢貢舉惟傳歲薦士行鄉飲酒禮士不遠千里趨之傳少時好獵嘗醉遇虎與鬪搏之不置旁助以劍遂勝虎及貴歎曰士處世尚智勿效吾暴虎因畫搏虎狀以戒子孫人以爲貽謀之善云



宋潘美字仲詢大名入父璘以軍校戍常山美少倜儻嘗曰大丈夫當因亂世立功名而碌碌與萬物共盡可羞也開寶三年征嶺南以美爲行營都部署尹崇珂副之師平賀州下昭桂連三州兵至韶州攻拔之斬獲數萬銀窮蹙遣其左僕射蕭灌中書舍人卓惟休奉表乞降美因諭以上意以爲彼能戰則與之戰不能戰則勸之守不能守則諭之降不能降則死不能死則亡非此五者他不得受美即令殺直冉彥家部送灌等赴闕銀復遣其弟保興率衆十五萬拒戰美率勵士卒兼程趨柵頭諸將計曰竹木爲柵火攻必亂因馳精銳夾擊之萬全之策也遂遣丁夫數千人持二炬間道抵柵及夜萬炬俱發會天大風火勢益熾銀衆驚擾美麾兵急擊之銀衆大敗斬首數萬長驅至廣州遂克之擒銀馳至京師露布以聞即日命美知廣州兼市舶使五年兼嶺南道轉運使土豪周思瓊作亂美討平之嶺表遂安初南中身丁錢甚重雖婦女不免乃奏罷之終檢校太師同平章事卒贈中書令謚武惠子惟熙以父功授官

舊志作子睿悞今正之



尹崇珂秦州天水人累遷殿前都指揮使乾德中征嶺表以崇珂爲行營馬步軍副都署克廣州擒劉鋹即日詔與潘美同知廣州兼市舶轉運等使錄功遷保信軍節度未幾南漢開府樂範容州都指揮使鄧存忠韶州賊帥周思瓊春恩道都指揮使麥漢瓊等據五州之地以叛崇珂討之太祖遣中使李神祐督戰數月盡平其黨還治所六年卒贈侍中遣中使護其喪歸葬洛陽

王明字如晦大名成安人天福二年進士爲左拾遺會用兵於嶺南選爲荊州轉運使與主將攻剋賀州因抵廣州賊衆十餘萬拒戰是夕大風發屋折木衆乃驚懼明與都部署潘美等謀命丁夫數千人持二炬間道先搗賊壘大軍蓐食陣以待之俄而萬炬皆發焚其柵賊驚果來犯大軍因逆擊之賊大敗斬首數萬劉鋹以城降廣州平爲東道轉運使所至險阻盡通而糗糧無缺太祖嘉其功以潘美尹崇珂爲嶺南轉運使以明爲副使明徧歷部內視民疾苦舊無名科斂悉條奏除之嶺表遂安七年代歸



廣東通志 卷之二十一 二  
三百四十五  
周渭字德臣連州人建隆初進士解褐白馬主簿太平興國中爲廣南轉運副使奏去劉鋹時繁稅廣人德之遷殿中丞屬交趾抗命師出無功渭移書諭以朝廷威信遂入貢進監察御史在嶺南六年徙知揚州歷益州轉運使

楊克讓字慶孫馮翊人晉末舉進士開寶初爲西川轉運使代還疏民利病十事歷知廣州兼轉運市舶使初太祖以克讓奏十事稱旨詔升殿慰勞面賜金紫將大用之偶問侯陟識克讓否對曰臣與克讓甚善知其才識佳士也近聞其自言上許以大用多市白金作飲器以自奉臣頗怪之上怒亟出克讓典郡陟之險詖妬賢如此

楊允恭綿竹人少倜儻任俠開寶中官廣連都巡檢使以海鹽盜入嶺北民犯者衆請建大庾縣爲南安軍自是少冒禁者歷遷康州刺史

李符字德昌內黃人太平興國初知廣州兼轉運使二年符圖海外諸城及嶺外花木各一以獻在任有善政民爲立生祠五年召爲右諫議大夫後坐事謫



廣東通志  
卷之三  
知春州

向敏中字常之開封人太平興國五年進士歷轉戶部判官知制誥未幾以勞累出知廣州入辭面陳其情太宗感動轉員外郎遣之許以不三歲即召還州兼市舶使前守多涉譏議敏中至荆南預市藥物以往在任無所取以清廉著尤曉暢民務善處繁劇擢廣南東路轉運使歷左僕射昭文館大學士卒贈太師中書令謚文簡

許仲宣字希粲青州人太平興國中爲廣南轉運使會用兵自廉欽征交州其地炎瘴士卒死者十二三大將孫全興等失律仲宣因奏罷其兵不待報即以兵分屯諸州開庫賞賜馳檄諭交州黎桓即款附遣使修貢仲宣復上章待罪帝嘉之初仲宣之遣兵也人或難之仲宣曰若待報稱積屍徧野矣罪一人活千萬人吾何恨哉堯熙四年以諫議大夫出知廣州仲宣性寬恕而侷儻有心計處變晏然人服其量後遷給事中卒

凌策字子奇宣州涇人雍熙二年進士歷廣南西路



廣東通志 卷六十二 天祥  
轉運使嶺南驛輸香藥置卒萬人分舖二百負擔抵  
京師上以煩役爲患詔策規制之策請陸運至南安  
汎舟而北止役卒八百大省運費盧之翰知廣州無  
廉稱上以策有幹名命代之廣英路自吉河趣板步  
二百里盛夏瘴起行旅多死者策請從英州大源洞  
伐山開道直抵曲江民甚便之

張士遜字順之陰城人淳化進士歷官侍御史徙廣  
東轉運使至南雄奏除苛政蠲戶役十餘事累遷禮  
部尚書同中書門下平章事拜太傅封鄧國公致仕  
宰相得謝自仕遜始卒年八十六帝臨奠贈太師中

書令謚文懿

陳堯叟字唐夫蜀新井人端拱三年登甲科解褐光  
祿寺丞直史館與父省華同日賜緋遷秘書丞廣南  
西路轉運使嶺南風俗病者禱神不服藥堯叟爲集  
驗方刻石柱州驛又以地氣蒸暑爲植樹鑿井每三  
十里置亭舍具飲器人免渴死會加恩黎桓爲交南  
信使初將命者必獲贈遺數千緡桓責賦歛於民往  
往斷其趾堯叟授以朝命而却其餽凡有亡命來奔



者悉以歸桓桓感恩併捕海賊爲謝先是歲調雷化高藤容白諸州兵使輦軍糧汎海給瓊州其兵不習水利率多沉溺咸苦之海北岸有遠角場正與瓊對伺風便一日可達與雷化高太平四州地水路接近堯叟因規度移四州民租米輸于場第令瓊州遣蠻兵具舟自取人以爲便代還加刑部員外郎充度支判官未幾會撫水蠻酋蒙令國殺使臣擾動命堯叟爲廣南東西兩路安撫使至道中知端州後拜右僕射卒贈侍中謚曰文忠

周湛字文淵登州人以進士歷都官員外郎擢提點廣南東路刑獄初江湖民略良人鬻嶺外爲奴婢湛至設方畧搜捕又聽其自陳得男女二千六百人給飲食還其家

曹利用字用之趙州寧晉人少喜談論慷慨有志操祥符中知宜州劉水規馭下殘酷軍校乘衆怨殺水規叛陷柳城掠廣州嶺南騷動帝謂輔臣曰向者司天占候當用兵朕固憂遠方守將非其人以起邊釁今果然曹利用曉方略盡心干事其以爲廣南安撫



使利用至嶺外遇賊武仙縣賊徒標蒙采盾衣甲堅利鋒鏑不能入利用使士卒持巨斧長刀破盾遂斬首以徇嶺南平後拜樞密使同中書門下平章事

胡則字子正婺州永康人以進士起家為京西轉運使遷禮部郎中徙廣州路轉運使有番船遭風至瓊州且告食乏不能去則命貸錢三百萬吏白夷人狡詐且風波不可期則曰彼以急難投我可拒而不與邪已而償所貸如期後徙杭州再遷兵部侍郎致仕卒則果敢有材氣達節好施然無廉聲喜交結故為

輿論所少

郎簡字叔廉杭州臨安人進士及第累遷尚書度支員外郎廣南東路轉運使擢秘書少監知廣州捕斬賊馮佐臣境內賴安入判大理寺歷給事中知揚州以工部侍郎致仕卒年九十

黃震字伯起建州浦城人進士及第累遷著作郎知饒州徙廣東轉運使先是廣南歲進異花數千本至都下道路苦其煩擾震奏罷之震在真宗朝數論事既卒詔進一階



張昱之字景山清河人進士及第仁宗時累官至廣南東路轉運使夷人有犯其酋長例得自治刑多慘酷請以漢法從事一路肅然

王絲紹興人慶曆中以侍御史為廣南東路轉運使兼市舶提舉舊番舶之來十稅其一必擇精者絲令精粗兼取夷人悅之絲繼張昱之之后二人所尚不同昱之繩以嚴絲泄以寬然夷情亦莫不服

魏瓘字用之歙州人以父廕歷提點廣南西路刑獄遷轉運使劉鋹時計口以稅雖舟居亦不免至是而

雷化欽廉高州猶未除瓘為除之遷太常少卿知廣

州築州環城五里踰東江門鑿東西澳為水閘以時

啓閉復于城南闢凌霄門

在學宮之前今石刻猶存

尋拜右諫議

大夫仍知廣州為臨江軍判官史沆誣許詔遣內侍

發驗沆坐不實瓘亦降知鄂州後儂智高寇廣東西

獨廣州城堅守不能下於是論築城功遷工部侍郎

集賢院學士復知廣州兼廣東經畧安撫使給禁卒

五千聽以便宜行事屬狄青已破賊召還糾察在京

刑獄



狄青字漢臣汾州西河人善騎射初隸騎御馬直尹  
洙薦於韓琦范仲淹一見竒之從征元昊有功累遷  
樞密副使皇祐中廣源蠻儂智高反陷邕管圍廣州  
嶺外擾動仁宗以青爲宣徽南院使經制廣南盜賊  
事置酒垂拱殿以遣之至即斬敗將陳曙袁用等三  
十人以徇諸將股栗已而下令軍中休十日窺者咸  
以爲軍未即進值上元節大張燈以享將校酣飲夜  
分青忽起如內使孫元規暫主席青已整軍大破智  
高于崑崙關下追奔五十里斬首數千級其黨黃師  
宓儂建中智中及僞官屬死者五十七人生擒五百  
餘人梟師宓等斂屍築京觀時屍有衣金龍衣者衆  
謂智高已死欲以上聞青曰寧失智高不敢欺朝廷  
以貪功也時交趾欲出兵助討余靖言其可信青曰  
假兵于外以除內寇非我利也請罷交趾助兵時服  
其識乃振旅還京帝嘉其功拜樞密使卒贈中書令  
謚武襄

余靖字安道韶州曲江人皇祐四年儂智高圍廣州  
朝議起靖知桂廣經制廣東西賊乃趨廣州靖先移



檄交趾及諸峒使捍禦會朝廷命宣徽使狄青將兵至大戰於崑崙關智高敗走靖選敢死士入特磨道生擒智高毋與弟送闕下戮之後知廣州先是番舶裝發皆征稅靖奏罷之以來遠商又戒官吏不得市南藥及歸不持南海一物廣俗輕揚教之禮法簡而不苛百姓懷之終工部尚書謚曰襄

楊旼字樂道隴西人進士及第歷官知岳州詔往韶連等州招安乃約賊使出峒授田爲民而轉運使欲授以官與貲納質使還旼曰賊剽攻湖廣七年所殺不可勝計今使餽貲糧據峒穴其勢不久必復亂明年春賊果復出陽山旼即領衆出嶺外涉夏秋凡十五戰賊潰旼感瘴疾歸蠻平除起居舍人知諫院廣南東西路體量安撫使經制賊盜旼至韶州會張忠戰死智高自廣州回軍勢愈熾旼不能抗遂殺蔣偕王正倫敗陳曙復據邕州旼坐是落知諫院後進龍圖閣直學士卒家無餘貲特賜黃金二百兩宋之獎勸廉吏若此

孫沔字元規會稽人登進士第跌蕩不羈歷官樞密



直學士知秦州時儂智高反沔入見帝以秦事勉之對曰秦州不足煩聖慮陛下當以嶺南爲憂及聞蔣偕死帝曰南事誠如沔料以爲湖南江西路安撫使加廣南東西路安撫使沔請益發騎兵增選偏裨求武庫精甲五千居二日促行才與兵七百沔慮賊渡嶺而北乃檄湖南北曰大兵且至宜繕營壘多備宴犒賊疑不敢北會遣狄青爲安撫使與智高遇戰歸仁輔智高敗走廣南平沔留治後事遷給事及至帝問勞解御帶賜之歷官觀文殿學士知慶州卒

劉几字伯壽洛陽人儂寇犯嶺南以几爲廣東西提  
使馳至長沙見狄青曰賊若恃勝來戰此易成擒耳及大戰於歸仁輔前鋒孫節死几以右軍搏鬪言於青出勁騎五千張左右掖擣其中堅大破之進湟城使

郭逵字仲通陝人時李乾德陷邕管詔以逵爲廣南經略招討使兼宣撫使大戰富良江斬僞王子洪真乾德懼奉表歸命

元絳字厚之錢塘人生而敏悟舉進士歷官直集賢



院爲廣東轉運使儂智高叛絳建瀕江水砦數十以待逋寇繕治十五處樓堞械器皆備軍食有餘寇平以功遷工部郎中後叅知政事卒贈太子少師謚曰章簡

王罕字師言成都華陽人爲廣東轉運使行部潮州儂智高圍廣州知州仲簡募人置書間出要罕罕報曰罕家在圍中非不欲歸顧獨歸無益當爲解圍計行至惠州四境惡少乘機搆亂時惠無備衆邀罕出城鎮撫罕不得已召耆長八發壯丁又召尉徵民增

弓手耆長所發又無至者適有婦人訴僕夫奪其鉞珥者罕令斬僕夫首置道傍告百姓曰壯丁不行故誅之民聚觀有懼色於是耆長得壯丁六百尉得弓手二千皆集軍聲遂振罕又選銳士三千徒卒有材技者數十以舟百四十艘建旗作樂順流趣廣州未至徒卒進曰廣之南門去水尚百步賊兵在傍我軍趨門賊來薄必亂乃遣人登岸斬木枝爲鹿角數千既至今徒卒先登士以鹿角從之布岸上屬于南門智高擁衆臨觀不敢犯罕徐勒兵作樂開南門以入



城中守備益固智高解去罕之智勇有足多云

盧革字仲辛德清人少舉童子科知杭州馬亮見其詩嗟異之秋貢士密戒主司勿遺革聞語人曰以私得薦吾耻之去弗就後二年遂首選登第年方十六慶曆中知襲州蠻入寇桂管騷動革經畫軍需先事而集移書安撫使杜杞請治諸郡城及易長吏之不才者復言嶺外小郡合四五不當中州一大縣無城池甲兵之備將爲賊困宜度遠近并省之後儂智高來九郡相繼不守皆如革慮知婺泉二州提點廣東

刑獄以廉明著聲神宗稱之後以光祿卿致仕

范師道字貫之蘇州長洲人進士及第知常州徙廣南東路轉運使舊補攝官皆委吏胥無先後遠近之差師道爲置籍次第之人莫敢欺後遷直龍圖閣知明州

榮諲字仲思濟州任城人舉進士累遷廣東轉運使英之滇陽峽絕險林木蔽虧霧氣瘴毒釣魚臺壁立江濤鳥道不通乃從山後鑿石架木爲棧道七十間直至江口抵清遠趨廣州遂爲夷塗累官秘書監



蔡抗字子直宋城人嘉祐中以秘閣校理太常博士  
知蘇州改廣東路轉運使漕政簡靜事無旁滯脩飭  
藥洲亭館迄今勝槩猶存

袁抗字立之洪州南昌人舉進士累遷提點廣南東  
路刑獄浙東叛卒鄂鄰掠閩越轉南海與廣州兵逆  
戰海中值大風有告鄰溺死者抗獨曰是日風勢趣  
占城鄰未必死後果得鄰於占城還爲度支三司判  
官改少府監卒抗喜藏書至萬卷子陟殿中丞

祖無擇字擇之上蔡人進士高第歷知南康州提點

廣東刑獄政暇每遊山水嘗至羅浮賦詩後擢廣南  
轉運使長於言語政事爲時名臣神宗時與王安石  
不合被謫尋復光祿卿秘書監爲人篤於師友少從  
孫明復學經術穆脩爲文章皆采其遺文以傳

王靖字詹叔大名人素之從子以司勳郎中爲廣東  
轉使巡行十六州雖瘴癘不辭嘗與盧士宏靖蠻亂  
設方略弭盜賊發太倉賑水災民無流亡者歲貢香  
藥以吏代之民罷役者八百戶戍兵死者予錢資斂  
而請以兵代戍民感其德立祠祀之



蕭世京字昌孺龍泉人嘉祐中進士爲廣東路提舉  
常平公事能樽節出入改轉運副使益著清譽蔡京  
爲相奏舉十事京啣之罷歸後擢吏部員外郎

孫載字積中崑山人登進士熙寧中知德清縣賑饑  
弭盜以績最神宗以載姓名付中書除廣東常平觸  
暑行部以宣德意元祐初通判陝州遷廣東轉運判  
官牘無滯人頌其廉能政暇卽遊羅浮訪古賦詩遷  
朝請大夫致仕一日徧謁先隲反嘗往來者居亡何  
卒年七十二載天資樂易長於吏治好汲引士類受  
薦者至四百餘人後多知名少喜讀易著釋解五十

卷

韓謹字去華晉江人崇寧二年進士調南海尉以捕  
盜賞改宣議郎除處州教授著詩禮義解上之召爲  
國子博士改除廣南東路提舉學事自巡尉未再基  
擁使節近代所無也

郭孝友字次仲龍泉人政和進士歷提點廣南東西  
路刑獄捐騶從躬按歷貪懦守令劾奏不宥累官工  
部侍郎秦檜與金約和廷議多不合檜以孝友同舍



生異其附已孝友曰議和非至計因遂銷兵如後患  
何士大夫豈好生事者願審思之檜不懌曰次仲亦  
爾耶以敷文閣待制致仕

陳橐字德應紹興餘姚人入大學有聲登政和上舍  
第累遷權刑部侍郎除徽猷閣侍制兼廣州經略使  
兵興後廣東盜賊無寧歲十年九易牧守橐盡革弊  
政以恩先之留鎮三年民夷悅服初朝廷移韓京一  
軍屯循州會柳冠駱科犯廣西詔遣京討之橐奏廣  
東累年困於寇賊自京移屯敵稍知畏今悉軍赴廣  
西則廣東危矣橐檜以橐爲京地坐稽留機事降秩  
遂致仕橐博學剛介不事產業先世田廬悉推予兄  
弟在廣積年四方聘幣一不入私室旣謝事歸剡中  
僑寓僧寺後游十二年而卒王十朋論近世會稽人  
物謂杜澆之後有橐云

連南夫湖北德安人高宗時累官廣東轉運使新興  
饑發粟賑濟全活以萬計後知廣州兼經略使兵馬  
鈐轄韓京受命領兵三千屯營廣州恃恩不法南夫  
委曲黔制京遂革心爲善會潰軍掠南雄招撫得宜



餘黨屯聚京擊破大盜七十餘屯民賴以安盜平授  
建州觀察使知循州時兵燹之後邑里蕭條初至猶  
招集流亡百廢具興守循十年大有功於民嘗督兵  
捕賊于梅守臣銜之譖于朝遂罷去後循人繪像祠  
於州學南夫啓導乎化之力也

龔茂良字實之興化軍人紹興進士第歷直秘閣知  
江寧府以忤權倖求去起廣東提刑修建郡學又置  
番禺南海學既成釋奠行鄉飲酒以落之城東舊有  
廣惠庵中原衣冠沒於南者葬之歲久廢茂良訪故  
地更建海會浮圖敢寄暴露者皆拵藏無遺召對崇  
政殿拜叅知政事

李鞞字彥淵杭州富春人崇德二年進士宣和初提  
舉廣東市舶珍貨一無所取舶聞輻湊比召還盜邀  
之隨行書帙而已歛跡避去

芮華字國器烏程人登進士官至左從政郎嘗和沈  
長卿詩云寧令漢社稷變作莽乾坤秦檜惡之坐竄  
化州檜死始召用爲廣東提刑以文章飭吏事雍容  
儒雅人推重之後爲國子司業晚歲詩益奇有文集



廣東通志 卷之三十一 三十一 三百三十一  
藏于家

楊萬里字廷秀吉水人登紹興進士歷提舉廣東常平茶鹽盜沈師犯南粵帥師往平之孝宗稱爲仁者之勇遂有大用意就除提點刑獄請於惠潮二州築外砦潮以鎮賊巢惠以扼賊路俄以憂去免喪召爲郎官歷寶謨閣直學士致仕卒年八十二贈光祿大夫萬里嘗著易傳學者稱誠齋先生謚文節

林光朝字謙之興化莆田人聞吳中陸子正嘗從尹焞學因往師之自是專心研究聖賢性理之旨通六經貫百氏言動必以禮四方來學者嘗數百人南渡後以伊洛之學倡東南者自光朝始然未嘗著書每言道全體乎太虛六經旣發明之後註解者已汗牛若復增加道愈遠矣孝宗隆興元年光朝年已五十及授禮部郎歷廣東提點刑獄茶寇自荆湘剽掠光朝率師遮擊破之後孝宗聞之喜曰光朝書生乃知兵耶加直謨閣歷工部侍郎

楊長孺字伯子枯人以蔭補守湖州累官廣東經畧安撫使知廣州事每對客曰士大夫清廉其人品已



可槩見嶺南群吏獨長孺以清白著下詔獎諭謂其清似隱之改安撫福建真德秀入對寧宗問當今廉吏德秀以長孺對後歷敷文閣直學士致仕郡人立像與吳隱之合祠

敖陶孫字器之福清人少倜儻有大志爲文章援筆立就弱冠魁鄉薦遂補入太學韓侂胄逐朱熹陶孫首賦詩相送趙汝愚謫死陶孫爲文哀之又揭詩于通衢云九原若遇韓忠獻休說渠家末世孫后登進士第爲廣東運判詳讞明允終溫陵僉判

潘時字德鄰婺州金華人以叔良貴廢乾道中累遷廣南東路提點刑獄除直秘閣知廣州兼主管廣南東路經畧安撫使司公事廣東地接郴桂汀贛之境四州之民歲一踰嶺貿易折閱即聚爲盜大群至數千人時入境適捕得渠卒八人即斬以徇曰三日而去者吏不得格期外不去復捕如初於是皆散有梁氏兄弟者招納亡命前後殺人無數號爲四彪時捕誅之汙瀦其居它盜望風破膽大奚山斗入海中寇攘所聚雖良民亦以魚鹽爲命新置都鹽使者銳欲



禁之檄水軍逐捕時陰募其苗豪使以捕賊自効由是盜發輒得有功者爲奏補官鬪死即官其子而罪其不赴採者官屬不幸客死悉厚賻歸不令失所荷德者三十餘家士族子女失身非類贖而歸之人心感悅終朝議大夫直顯謨閣卒

黃洧字清臣甌寧人以蔭補乾道四年任廣南東路提舉市舶州帥市賈胡香不償值洧舉法移州帥愧且懼亟召歸之爲轉運判官廣學租禮名士益勸諸生以學番禺令恣意爲姦洧捕其吏屬劾治之抵罪以去一路肅然官吏始知有法守矣市民困官估輒移文罷之爲除市籍物價遂平嶺南丁籍久失口賦逋負害及鄰伍流亡日衆洧選能吏覈而蠲焉除至十五萬口按行所部雖瘴藪不避問疾苦理冤抑不可勝計江浙歲饑詔發二廣倉米往賑之洧區畫有方不越月米至永嘉者八萬斛永嘉人焚香迎拜曰此廣東運使活我也歷官朝散郎卒朱熹銘其墓

劉燾字晦伯建陽人與弟炳受學于朱熹呂祖謙乾道八年舉進士通判潭州尋以憂去會僞學禁興遂



築雲庄山居爲肥遁計調贛州坑冶司歷知德慶府  
轉提舉廣東常平令守臣歲以一半易新春末支及  
冬復償存其半以備緩急逋亭戶錢十萬轉運司五  
萬燻以公用庫贏錢補之大小諸弊莫不條陳召入  
奏事首論公道明則人心自一朝廷自尊雖危可安  
也公道廢則人心自貳朝廷自輕雖安易危也帝嘉  
獎遷尚左郎官權工部尚書賜衣帶鞍馬兼太子右  
庶子仍兼左諭德每講讀至經史所陳聲色嗜欲之  
戒輒懇切再三敷陳之卒贈光祿大夫官其後賜謚

文簡所著有奏議史藁詩解禮記解雲莊外藁

廖德明字子晦南劍人嘗從朱熹學得心傳之秘乾  
道中登進士第知莆田縣痛革淫祠改潯州教授廣  
濂溪書院以訓課生徒嘉定初擢廣東提點刑獄不  
避權勢盜攻桂陽逼韶韶人震怖德明談笑自若遣  
將馳擊躬往督戰大破之乃謹戍守遠斥喉明賞罰  
韶郡晏然以治行高等晉知廣州以所學誨誘人士  
士風詵詵然知向于正陟吏部左選郎奉祠卒  
陳峴字山甫温州平陽人少篤學工文辭淳熙丁未



廣東通志 卷之三十一 三十一  
進士歷官有政聲嘉定元年以集英殿脩撰知廣州  
軍州事兼勸農使充廣南東路經畧安撫使馬步軍  
都總管先是邑民苦預借峴至蠲諸邑宿逋四萬六  
千緡免大禮歲助賞錢一萬四千緡罷諸場稅額最  
爲民害者二千五百緡幕僚以舊額請峴以州賦代  
輸且奏于朝無得預借民獲甦息廣學宮治城濠設  
閘門渚水以備非常閱歲百役並興勞費不憚時獠  
寇部界謀窺州城峴募勇敢軍日加訓練益爲備城  
以南戶口繁夥舊無悍蔽乃築東西鴈翅城以翼之

郡號多士貢額纔十三峴爲請于朝嘉定二年增額

爲二十五帥廣三年政務寬簡民甚德之嘗以政暇  
委州文學齊琥監鹽倉季端仁編南海志凡都會名  
蹟堙遏弗彰者皆補書之遂成一方信史

楊思溫清江人登紹興進士第乾道八年爲清海軍  
節度使寬惠慈和民賴撫綏開禧二年致仕民不能  
舍去后常思之

唐儀之字體仁嚴陵人紹興二十一年進士淳熙二  
年爲廣南東路提點刑獄下車首建周濂溪祠張栻



為之記三年擢廣東轉運使論實鹽官鬻之弊孝宗  
躉之尋擢吏部侍郎

李綸字世美泉州人以蔭歷仕有清操淳熙初提舉  
廣東常平日適伯兄維守恩平酌別江濱兄弟相勵  
以清白綸慷慨臨江籲天曰倘負軍民有如此水遂  
投杯于江杯停不沒者久之觀者驚歎綸與兄維卒  
以廉稱云民為歌曰石門之水清且清晋吏一軟千  
古榮爭如李公以杯盟江流洶洶杯停停

管鑑字仲明臨川人以父蔭補官任至廣東提刑權

知七印吏不能欺減惠潮七郡丁租置廣安宅以給  
士夫南遷不能還者其幹公務恤民隱日孳孳不少  
倦也

何坦廣昌人淳熙十一年進士少貧好學提刑廣東  
杜絕請託洗冤澤民斷獄得情以廉平為嶺南首稱  
官至寶謨閣學士卒謚文定

徐清叟字直翁應龍之子第進士歷官知廣州兼廣  
東經畧安撫使清叟素薦用真德秀魏了翁風度凜  
然卒贈少師



楊大異字同伯醴陵人從胡宏受春秋大義登嘉定進士第歷大理寺丞進直秘閣提點廣東刑獄兼度事時常平司逋負山積械繫追索姦蠹百出大異與之約悉縱遣之負者如期畢翰吏無所容其姦訪張九齡曲江故宅建相江書院以祀之改提點廣西刑獄

劉應龍字漢臣瑞州高安人嘉熙二年進士歷寶章閣廣南東路轉運判官遷秘書監兼國史編脩寶錄檢討南海寇作朝廷患之乃以顯謨閣待制知廣州廣東經畧安撫使寇聞應龍至遁去應龍剿逐之南海大治德祐元年遷兵部尚書寶章閣直學士

陳曄福州人曾祖襄篤行循良由刪定官出守臨江治績居最曄憲嶺南職司甚優詔郡東西橋廢久不治民涉且病曄首復其東橋江面七百尺用舟五十費五百餘萬計日而成毫髮不擾憫官族流落無依倣廣恩館之制剏安仁宅而居之又得廢寺絕戶之田歲入二千斛以口數均給嫁聚喪葬歛助有差凡護樁出嶺者亦量遠近賙之



廣東通志 卷之二十二 四十一 三百三十一  
雷宜中字宜叔豐城人淳祐七年進士第二人爲賈  
似道記室以不合去經略廣東比還奏復吳潛官及  
濟王竑封爵帥廣月餘卒

余琰字伯華永豐人淳祐進士第授廣東提刑持已  
廉潔當時立廉吏碑琰居其一

劉克莊字潛夫莆田人吏部侍郎彌正之子通古今  
熟典故爲真德秀所知歷廣東提刑仰慕崔清獻爲  
之表章遺文祭其祠莫嘆曰完名高節百世師也歷  
工部尚書龍圖閣學士致仕卒謚文定

宋末死事諸臣

宋自陳橋受禪繼之以忠厚培之以仁義延祚三  
百竟隕絕於犬羊不亦悲乎余嘗深惟其始末自  
古亡國者亦代有之未有如宋君臣之慘者流離  
百折由汴而杭杭而閩閩而廣苟延海島以至於  
十萬浮屍同歸于盡當是之時尚曰從容就義爲  
大耳千鈞一髮勢無不絕也因錄死事之臣于宋  
末亦以見同一死節而與波俱逝莫表其名固亦  
有幸不幸耶



文天祥字宋瑞又字履善廬陵人美哲如玉顧盼燁然年甫弱冠理宗親拔進士第一考官王應麟奏曰是忠肝鐵石也臣敢賀得人開慶初元兵侵宋宦官董宋臣說上遷都人莫敢議其非天祥時入爲南海軍節度判官獨上書乞斬宋臣以一人心不報即口免歸後稍遷至刑部郎官宋臣復入爲都知天祥又極言其罪亦不報出守瑞州改江西提刑遷尚書左司郎官累以臺論罷除軍器監兼權直學士院忤賈似道又諷臺臣張志立劾罷之即援錢若水例致仕持年三十七咸淳九年起爲湖南提刑故相江萬里素竒天祥志節因見語及國事愀然曰吾老矣其在君乎次年改知贛州德祐初江上報急詔天下勤王天祥捧詔涕泣遂起兵諸豪傑皆應有衆萬人事聞以江西提刑安撫使召入衛其友止之天祥曰吾亦知其然也第國家養育臣庶三百餘年一旦有急無一人一騎入關吾深恨此故不自量力期以身殉之天下忠臣義士將有聞風而起義勝者謀立人衆者功濟社稷猶可保也天祥性豪華平生自奉甚厚聲



伎滿前至是痛自貶損罄家資爲軍費每與賓佐語及時事輒流涕撫几言曰樂人之樂者憂人之憂食人之食者死人之事八月天祥提兵至臨安除知平江府時以丞相陳宜中未還朝不遣朝議方擢呂師孟爲兵部侍郎封呂文德和義郡王欲賴以求好師孟益偃蹇自肆十月宜中至天祥陛辭復上疏乞斬師孟豐鼓以作將士之氣且言宋懲五季削藩鎮矯尾大之弊國以衰弱馴致中原陸沉痛悔何及今宜分天下爲四鎮建都督統御其中彼備多力分疲於奔命敵不難却也時議難之不報元兵破常州入獨松關宜中召天祥出平江守餘杭明年正月除知臨安府會宋降元宜中與張世傑皆去仍除天祥樞密使尋除右丞相兼樞密使使如元軍請和與元丞相伯顏抗論臯亭山伯顏怒拘之偕宰執吳堅賈餘慶謝堂家鉉翁劉岳至鎮江天祥與其客杜潁十二人夜亡入真州時李庭芝鎮揚得一脫歸卒言元已密遣一丞相入真州說降矣既而苗再成出迎陳興復計天祥大稱善即以書遣二制置遣使四出約結庭



芝猶疑天祥使再成亟殺之再成不忍給出相城壘以制司文示之閉之門外復遣二路分覘天祥果說降者即殺之二路分與天祥語亦憐其忠義不忍殺以兵二十人道之揚四鼓抵城下聞門者談制置司下令備文丞相甚急衆相顧吐舌乃東入海道遇兵伏環堵中得免然饑甚莫能起從樵者乞得餘糝羹行入板橋兵又至衆走伏叢篠中兵入索之執杜滸金應解所懷金與之得免虞候張慶矢中目身被二創天祥偶不見獲滸應募二樵者以背荷天祥至高郵郵應以憂憤死滸與天祥汎海至温州端宗未立天祥上表勸進以觀文殿學士侍讀召至福州拜右丞相尋與宜中等議不合七月乃以同都督出江西遂行收兵入汀州十月遣叅謀趙時賞諮議趙孟滌將一軍取寧都叅贊吳浚將一軍取零都劉洙蕭明哲何時陳子敬皆自江西起兵來會聞武岡教授羅聞禮復永豐已而兵敗被執死於獄爲製服哭之哀明年吳浚降來說天祥天祥縛縊之繼入興國遣兵復諸縣元將李恒兵猝至天祥引兵走追至空坑軍士



皆潰天祥妻妾子女皆見執事在本紀時賞坐肩輿後兵問謂誰時賞曰我姓文衆以爲天祥擒之而歸天祥以此得逸去孫杲彭震龍張汴鞏信具遇害繆朝宗自縊死吳文煥林棟劉洙皆被執歸臨刑洙頗自辨時賞叱曰死耳何必言於是棟文炳及蕭敬夫蕭燾夫皆不免天祥收殘兵奔循州又明年三月進屯麗江浦六月入船澳端宗崩衛王繼立天祥上表自劾乞入朝不許八月加少保信國公軍中疫且起兵士死者數百人天祥惟一子與其母皆死十一月

進屯潮陽十二月趨南嶺先是詔諭副使鄒淵聚兵寧都爲元兵所敗同起事者劉玘鞠華叔願斯立願起巖皆死至是淵與劉子俊又自江西起兵來元帥張弘範兵濟潮陽天祥方飯五坡嶺弘範兵突至被執天祥吞腦子不死鄒淵自頸死劉子俊陳龍復蕭明哲蕭資皆死杜訐被執以憂死林琦張唐熊桂吳希奭陳子全兵敗被獲俱死惟趙孟滌何時陳子敬遁天祥見弘範不拜弘範以客禮見之與俱入厓山使爲書招張世傑不可索之固乃書零丁洋詩與之



弘範笑而置之厓山破軍中置酒大會弘範曰國亡丞相忠孝盡矣能改心以事宋者事皇上將不失爲宰相天祥泫然出涕曰國亡不能捄死有餘罪况敢逃其死而二其心乎弘範義之遣使護送至燕天祥不食八日不死即復食及至館供張甚盛天祥不寢處坐達旦乃移兵馬司設卒守之丞相博羅等召見詰數端爲天祥罪天祥辯論不少敗博羅欲殺之元主及諸臣皆不可元主求才方急遣南官王績翁諭旨天祥曰國亡吾分一死矣儻緣寬假得以黃冠歸故鄉他日以方外備顧問可也若遽召之非直亡國大夫不可以圖存舉平生而盡棄之將焉用我績翁欲合南官劉夢炎謝昌元等十人詰釋天祥爲道士夢炎曰天祥出復號召江南置吾十人何地事遂已天祥留燕三年坐卧一小樓足不履地元主知不可屈議釋之有以天祥起兵江西事爲言者元主召入諭之曰汝何願對曰天祥受宋恩爲宰相安事二姓願賜一死足矣然猶不忍遽麾之退言者力贊從其請乃即刑天祥從容謂吏卒曰吾事畢矣南鄉拜而



死俄有詔止之無及矣數日妻歐陽氏收其屍面如生年四十七衣帶中有贊曰孔曰成仁孟曰取義惟其義盡所以仁至讀聖賢書所學何事而今而後庶幾無媿

張世傑范陽人自金來歸爲呂文德小校累遷黃州武定諸軍都統制又以功加環衛歷知高郵軍安東州度宗末呂文煥以襄陽降元宋命世傑將五千人守郢元遣人招之不聽德祐元年徵諸將勤王多不至獨世傑提所部兵入衛上下歎異自和州防禦使不數月累加至保康軍承宣使總都督府兵遣將四出取諸郡兵勢頗振七月與劉師勇諸將出師焦山操戰艦名黃鵠白鷄者萬餘每十艘一鯨沉鐵碇於江示以必死元將阿木分兩翼以火矢夾攻董文炳兵合擊之自寅至午篷檣灼盡士卒投江溺水數萬人無一降者世傑奔圖山上䟽請濟師不報擢龍神衛四廂都指揮使數月進沿江招討使改制置副使兼知江陰軍元兵至獨松關加保康軍節度使知平江尋召入衛加檢校少保明年正月元軍迫臨安世



傑請移三宮入海願與天祥合兵背城一戰丞相陳  
宜中方遣人請和難之和亦尋沮元兵駐臯亭山世  
傑趨定海石國英遣都統卞彪來意與已俱南也椎  
牛享之酒半彪從容說降世傑大怒斷其舌磔之中  
子山遂從二少帝入福州與衆共立端宗拜簽書樞  
密院事王世強導阿剌罕來攻世傑奉帝航海由泉  
州入廣復潮州明年唆都遣人招帝又遣孫安甫說  
世傑命拘之不遣劉深急攻淺灣世傑兵敗移帝入  
井澳深復來攻世傑戰却之因徙碭洲帝崩奉第昺  
嗣帝位拜少傅樞密副使以碭洲不可居再徙厓山  
封越國公祥興二年正月張弘範等兵至厓山衆謂  
北兵若塞海口將困我不能進退盍先據之即不利  
猶可西走世傑慮久在海上衆或生離心動則必散  
乃曰頻年航海何時已乎今須與決勝負悉焚行朝  
草市結大舶千餘作水砦爲死守計已而弘範果據  
海口樵汲道絕兵茹乾飲鹹輒嘔泄大困世傑率蘇  
劉義方興日大戰弘範父柔自以降元累封蔡國公  
尊顯恒媿世傑是時弘範念世傑故父部曲嘗至港



外呼與道舊世傑不往甥韓在軍中使三至招之世傑曰降吾知必生且富貴直當為主死耳因歷數古忠臣以答二月癸未弘範等攻厓山世傑敗走帝舟元兵薄中軍世傑斷維以十餘艦奪港出還收兵厓山復欲奉楊太后求趙氏後立之太后聞帝計亦赴海死世傑收葬之海濱五月四日舟抵平章港颶風作世傑辦香祝天曰天乎不欲吾復存趙氏乎大風覆吾舟舟遂覆死焉

陸秀夫字君實楚州人其父徙家鎮江景定元年登進士第李庭芝鎮淮南得士爲諸鎮最號小朝廷聞其名辟至幕下三遷至主管機宜文字咸淳十年庭芝制置淮東擢叅議官德祐元年邊事急諸僚屬多亡者惟秀夫數人不去累擢宗正少卿兼權起居舍人二年正月以禮部侍郎使軍前請和不就而返與蘇劉義追從二少帝于温州召陳宜中張世傑等皆至遂相與立端宗于福州秀夫進端明殿學士簽書樞密院事與宜中議不合宜中使言者劾罷之世傑讓宜中曰此何時動以臺諫論人耶宜中惶恐亟召



還時君臣播越海濱楊太后垂簾與群臣語猶自稱  
奴每朝會秀夫儼然正笏立如治朝或時在行中淒  
然泣下以朝衣拭淚衣盡浥屬井澳風帝以驚疾崩  
群臣皆欲散去秀夫曰古人尚以一旅一成中興今  
度宗皇帝一子尚在百官有司皆具士卒數萬天若  
未欲絕宋此豈不可爲國邪又相與立弟昷嗣帝位  
時宜中往占城屢召不至乃以秀夫爲左丞相與世  
傑共秉政世傑駐兵厓山秀夫外籌軍旅內調工役  
凡述作又盡出其手雖匆遽流離中猶日書大學章  
句以勸講祥興二年二月厓山兵敗世傑劉義各斷  
維去秀夫走帝舟先杖劔驅妻子入海奏曰陛下當  
爲國死太皇太后辱已甚今不可再辱即負帝赴海  
死年四十四

徐宗仁字求心永豐人淳祐十年進士歷官國子監  
主簿開慶元年伏闕上書曰賞罰者軍國之綱紀今  
通國之所謂佚罰者不過丁大全袁玠沈翥張鎮吳  
衍翁應弼石正則王立愛高鑄之徒而首惡則董宋  
臣也是以廷紳抗疏學校叩閣至有欲借尚方劔爲



陛下除惡陛下乃釋而不問夫誤國之罪不誅則用兵之士不勇陛下亦嘗一念及此乎累遷太常少卿兼國史編脩實錄檢討知寧國府監察御史郭閻論罷德祐元年起歷權禮部尚書兼益王府贊讀從端宗海上厓山兵敗赴水死同赴水者樞密使高桂吏部侍郎趙樵兵部侍郎茅湘俱死翰林學士劉鼎孫沉海不死被執擄掠無完膚一夕得脫卒蹈海時湖南制置使張烈良提刑劉應龍皆起兵應厓山爲阿里海涯所敗烈良等舉宗及餘兵奔思州烏羅洞元兵襲之俱戰死有袁天與者不知何許人第進士丁父憂未仕聞厓山宋亡或勸其退伏草莽爲自全計天與不聽結義兵誓復州邑奮不顧身兵敗罵敵以死先是謝昌元趙孟頫及天與約同死國無何二人並食元祿獨天與踐其言一門自盡者十七人只遺一子

鄒鳳字鳳叔吉水人少慷慨有大節以豪俠行郡中郡吏嚴憚焉及勤王兵起鳳從天祥補武資景炎初改文階以寺丞領江西招諭副使聚兵寧都寧都陷



變姓名爲卜者得脫已復聚兵興永間表授江西副  
安撫統衆數萬攻興國復永豐縣進江東西處置屯  
兵境土充督府分司俄虜自隆興大至襲破瀉軍府  
兵失援因敗于空坑瀉間走谿谷潛結酋傑又得數  
千人入廣會劉子俊並趨潮陽見天祥甚懽劉興之  
誅瀉兵有力也及海豐移屯瀉爲殿值虜騎突出天  
祥陣中被執瀉遂拔劍自刎扶至南嶺死之

劉子俊字民章廬陵人嘗領漕貢與天祥相友善及  
開府興國子俊杖劍往從之有克敵功累官宣教郎  
兼行軍器監簿同督府機宜文字空坑之敗子俊收  
兵退保洞源尋引步卒入廣與元兵戰于江嶺之間  
所殺傷過當已復招集敗亡道遇鄒瀉與俱東至潮  
陽甫二十二日而及於五坡之難

杜濬字貴卿世爲天台大姓遊俠臨安虜逼臨安時  
嘗散萬金結客數千人見天祥于湖水上天祥與語  
壯之遂爲上客天祥北使濬力爭不可陳志導等叱  
去濬發諸客多避者濬獨毅然請行卒脫天祥於瓜  
步之間濬之力也及天祥聚兵南劍濬實與叅佐往



溫台募兵會福安陷相失久之尋自行朝奉命赴天祥軍空坑之敗濱危者數四後從入廣會潮陽移屯許護海舟去至五坡被執以憂死官至司農卿廣東提舉副招討使

林琦閩士也天祥守獨松關時琦結集赭山中忠義捍禦海道及南劍開府琦就辟叅謀官至宣教郎督機檢院天祥再入廣琦權通判惠州從至潮陽會明州海艘漂得水軍數百人與鄒馮子俊等兵合琦實教練之後五坡敗被執脫走惠州爲游兵所獲護以北

行防之彌謹琦志不在生乘間輒自投于河得援出

竟死建康

宋史天祥守餘杭又曰五坡兵敗馮同被執俱死與此異疑而存之

陳龍復字本叔泉南安老儒也與天祥同舉進士歷仕州縣有聲德祐初退居家食至天祥軍南劍時始辟爲督府叅議兼行太府少卿福建提刑是時天祥幕下多名士龍復獨以持重老成見推儔輩天祥每咨問焉後奉檄如漳潮計事再會天祥於循梅間尋分司潮陽號召諸路四方豪傑翕然嚮應天祥由是得入潮爲討賊之舉至則糧糗已具鄉兵多練習水



戰天祥賴之未幾移屯海豐龍復又從至五坡為虜  
騎追及遇害時年七十有二

蕭資吉水人少與同里金應俱以工書補掾史居天

祥幕下應從北使間關脫鎮江之難竟死通州應死高郵

見天祥傳天祥葬之城下而哭之哀官終承信即後天祥

入廣資獨周旋不去江西之敗資全督府印有功除

閣門路鈴轄尋從至潮陽移海豐見執于五坡死焉

其時又有永嘉人徐榛者亦掾史也初以省父湖北

迷失道因歸于行府常奉筆札與機務授正將五坡

兵潰惟榛一人得脫間走惠州聞天祥被執至廣廼

自詣北營請從之隨至豐城而卒

陳槩寧都人父繼周以貢士有軍功歷州郡棄官歸

贛德祐初詔下勒王天祥造門請謁時天祥繼周為知贛州

言間里豪傑及起兵方畧甚辯其長子太學生逢父

亦從旁贊奉籌畫天祥深器焉槩即逢父弟也天祥

之臨安繼周以二子從值北使兵散乃率衆還至則

贛已失守矣後詔以繼周知南安軍為元總管楊仔

所殺并殺逢父惟槩從天祥於江嶺間數歲竟死潮



陽

劉鼎孫字伯鎮江陵人第進士爲翰林學士從幸厓山與陸秀夫同心經畫國事不支秀夫抱帝赴海鼎孫亦驅家屬并輜重皆沉于海爲元兵所執榜掠無完膚一夕脫卒蹈海死其忠義亦秀夫之流云

茅相京口人從端帝入海島爲兵部侍郎厓山兵敗丞相陸秀夫抱帝赴海相與內翰劉鼎孫吏部侍郎趙樵樞密使高桂暨文武併妻子俱隨帝赴海死史臣表其忠云

趙樵爲吏部侍郎與茅湘等死于厓門之戰時湖南制置使張烈良提刑劉應龍起兵應厓山爲阿里海涯所敗俱戰死于陣今其子孫世典全節廟祀高桂汴梁人從宋幼主爲樞密使與張世傑經營戎務厓門兵敗隨帝赴海死焉

蘇劉義荆胡人景定初從呂文德鄂州戰陣有功轉十官四年復以守鄂功爲結州刺史劉義雖出呂氏乃心在王室推戴永嘉建植大功景炎新造拜檢校少保某軍節度使殿前指揮司司馬兼諸路經制鎮



撫大使廣東西策應大使遇張世傑用事志不得展  
丁丑七月罷諸使免蕪殿司帝在井澳元劉深來襲  
陳宜中如占城劉義不以爲是擢舟追之不及而返  
夜泊灣頭俄有天火飛集劉義舟延燒衆舟幾盡祥  
興嗣立進開府儀同三司殿前都指揮使厓山兵敗  
績與世傑同斷纜去世世傑死劉義亦爲亂卒所害

論曰余嘗過厓門吊宋行宮觀諸臣死事處未嘗  
不泫然涕泗也厓山無用武之地諸臣竭蹇蹇之  
忠良將勁兵盡於北虜航海之師無復生氣雖有  
十萬皆強弩之末潰不可使者昔人有言強者善  
取弱者不能守此之謂也因合五坡赴難之臣得  
十七人焉如南海黃俊東莞熊飛香山馬南寶新  
會伍隆起海陽馬發皆載獻徵忠烈科論其逸者  
趙時賞蕭明哲張唐熊桂吳希奭陳子全關而無  
稱余甚悲之冠裳污衹莫挽洪濤日月無光精衛  
氣結其間孰竄孰降屈辱腥膻之庭而享其棄餘  
曾鷗鳥之不若也獨幸忠義在人如水注地無處  
無之於是李祥起南海林桂起新會陳良臣起東



莞其後黎德張彊董贇舉之輩皆相繼而起是時  
宋祚波矣誰爲爲之母亦曰居宋之士爲宋之民  
必報讎寧事夷狄雖事之不濟而博浪之椎荆卿  
之匕首亦足以折強胡之氣以俟後來之豪傑也  
昔田橫不肯北面漢高而海島五百義士致動隆  
準咨嗟假令前數人者纓宋之組得與諸臣齊奮  
其飲胡之血固未知誰先後也昔之載事者或以  
民間作難隨起隨滅無益於成敗之數余因表而  
出之

元呂恕字仁卿河東人至元十八年任廣東宣慰副  
使時寇盜嘯聚阻水陸民艱食道殣相望恕力請于  
行省發倉賑貸又爲粥糜饑者就食日常數千餘人  
存活甚衆繼以荒歉恕復發糶以濟之無何調兵四  
出多俘獲恕加意宥釋賊舟臨城闔出城扞禦賊見  
恕戒其下無以矢石相向新州有重囚上于宣司恕  
知其非罪獨不肯署牒宣司怒徑驅囚往市將殺之  
恕亦與之偕往遂不果殺恕與宣司交訴于行省既  
而省牒竟直恕囚得不死廣人德之立碑于鄉校可



謂古之遺愛矣後卒于官

塔刺海哈魯合人至元十九年爲廣東宣慰使會征  
占城造海舟運糧驅民以役至有死者獨能散財募  
衆人樂爲用事皆先集且躬督米舟自南雄轉輸道  
中聞山獠出掠撫綏之遂平定功聞授中奉大夫再  
任建言廣東舊統封連德肇四郡歸附隸湖廣行省  
有旨復舊元貞二年時妖民周繼孫自稱天皇聚黨  
爲亂有告變者分遣諸軍夜半悉擒之至明而定誅  
其首餘無所問海舶多爲司馬存所侵奉省檄提調  
之廉而不擾蕃商大悅其後舶至者常倍焉由是增  
居民二萬七百餘戶官課七萬八千錠稅糧五萬一  
千五百餘石立水旱站一十餘水舖一十五起蓋倉  
庫驛舍官廨等七百一十餘區造征瓜哇船五百合  
皆不擾而辦大德元年山獠林珍古叻等作耗行省  
檄往招捕珍等相率請降進廣東道宣慰使都元帥  
廣西賊黎盛蔡全等侵境官軍屢出無功扶病指授  
方畧及二酋來歸時病已革俄卒於官人皆惜之後  
憲司薦其子馬速忽耳追頌其美



趙謙趙州人元貞元年授廣東道肅政廉訪使發擿平反官吏畏之民有湯姓者富於財爲仇人湯舉誣告於縣其姻維公輔常以他事告縣令正夔于憲臺因而憾之遂教訟者供公輔縛其僕袁二下水死鍛鍊成獄惟不獲屍謙以爲疑密購求之且檄城隍神期以七日必得如期果有捕獲袁二至者人皆以爲神力公輔遂得釋取其桎梏移之夔以其罪罪之夔尋病死其嗣斷類此爲政踰年一無所私

烏古孫澤大德間爲海北海南道廉訪使圭田之租量食而入餘悉委學官給諸生在雷州教民浚故湖築大隄竭三溪瀦之爲斗門七爲渠二十有四得良田數千頃瀕海廣瀉金爲膏土民歌之曰烏鹵爲田兮孫父之教渠之泱泱兮長我秔稻自今有平兮無旱無澇

劉鶚字楚奇永豐人皇慶間以薦授揚州學錄官至翰林脩撰紅巾盜起擢江州總管寇不敢犯改瑞州擢廣東廉訪副使守韶六年屢却強寇民賴以安後分兵討洞獠贛寇數萬猝至戰守力盡城陷被執不



屈還顛之慈雲寺自分必死乃書曰生爲元朝臣死  
爲元朝鬼忠節旣無慙清風自千古不食而終

論曰古帝王握符承籙鎮撫萬方何蠻貉之非臣  
妾也六朝以降五胡雲擾迭僭大號遂與中國抗  
衡顧未有偃然膺曆數竊閭位令冠履倒置若胡  
元也者非世運之大阨耶當其時禮崩樂壞彝倫  
攸斁乾坤爲之污穢士而值此惟有築岩釣渭以  
俟河清而已彼功名之士棄置靈龜而盱盱而耽  
耽抑首甘爲之隸何異冠猴而奉之乎丘文莊謂  
許衡仕元無能改於其俗雖不仕可焉非謬言也  
海洽孫澤輩各忠其類分定則然而遺愛若呂恕  
明刑若趙謙節義若劉鶚皆吾華人猶爾甄之亦  
以見食人之食者當憂人之憂旣君之矣何容二  
心即仕胡元猶然况際盛時逢聖主受民社之寄  
而不殫心竭力自負所學者非夫矣



去之審

其矣何容二

陽既苦敵精前善苦降歸省吾華人解節理之亦  
感合紆戰輩各忠其職令安限然而鼓變昔呂  
精衡出外無損如飲其谷雖不計其功其善言也

廣東通志卷之十三

潘省志十三

名宦

鴻惟

高皇帝龍飛淮甸虎闕嶺海廖將軍統桓桓之師溥  
皇仁於不殺何左丞表獻圖籍遂定粵東彼三山  
狂孽逞螳臂以當右車乃一鼓就擒靖鯨海而雄  
左壘豈不赫赫然稱仁者之功哉 帝念粵人去  
京師萬里文武大吏得賢為急乃先後命周禎汪



廣洋叅知行省以體恤其民繼以大理寺丞彭與民巡撫其地復命直指蔣公郁持繡斧巡行以乂安之而兩廣總督則自景泰三年命王忠肅公翱始藩左右伯則自洪武十一年命趙亨堅十四年命靳奎始臬憲則自洪武三年命御史鮑忠署按察始與夫守巡分司咸選名流以綏南徼念至切也載稽在事者多素絲之節貞介石之操廣仁惠之政茲並聯書于篇而使臣咨諏武臣捍禦凡有勞茲土者咸錄其績以樹風厲詩曰靖共爾位好是正直神之聽之介爾景福在事者其亦務正直以介景福永庇粵氓哉

國朝廖永忠廬州巢縣人少儻侗有大志元末兵亂率戰艦千餘艘屯巢湖爲水寨以觀時變乙未五月聞高皇帝起淮甸與兄永安杖策從之命永安爲水將副以永忠後永安陷于張士誠俾永忠總其兵累以功遷至平章洪武元年平閩二月拜征南將軍叅政朱亮祖副之率舟師由海道取廣東勅永忠等謂王者之師順天應人以除暴亂宜解倒懸大慰民



望廣東要地惟在廣州廣州既下則循海州郡可傳檄而定永忠自福州移書嶺表開示禍福往復書檄諭左丞何真真知天命有歸卽遣前都督事劉克佐檢校梁復初以廣惠梅循四州奉表內款夏四月師至廣真封庫籍戶口以歸廣州平遂分兵剿三山賊邵宗愚分省右丞鈇理迷失元帥吳都蠻等磔于市黨與悉平不閱月遂定南粵大兵所至秋毫無犯民不知擾市不易肆諸郡縣望風來歸及招諭海南無不響應五月班師送真歸朝復平廣西三年八月與朱亮祖凱還 上命 皇太子率百官迎勞于龍濟甚加慰諭三年十一月論功封德慶侯賜鐵券永忠貌不踰人而性識豁達撫綏初附甚得其宜廣人德焉建祠郡庠東廡後永忠被譴有司遂毀之

陸仲亨濠州人歲壬辰以義勇從起兵時年十七積功官至贛州衛指揮使守禦九嶺南北新附郡縣悉聽節制潮之梅州僻在嶺表仲亨調兵攻克之洪武元年二月勅仲亨及副使胡通帥本衛及雄韶等衛軍馬會征南將軍廖永忠等征廣東諭仲亨曰近命



平章廖永忠等由福建取廣東今特命爾帥師由韶  
州直搗德慶進師爲犄角之勢舉無不克廣東旣下  
合兵以取廣西但當撫輯生民毋縱侵掠四月仲亨  
率師畧定英德清遠連州肇慶等郡縣進攻德慶元  
守將張鵬程驅衆棄城遁遂長驅從廖永忠等入番  
禺協力平三山諸寇廣東平累遷同知都督府事三  
年十一月封吉安侯

周禎字文典江寧人以文學政事顯洪武初爲治書  
侍御史及建廣東行中書省除叅知政事時州縣經  
兵燹後官守未備百務草創禎至自郡縣長吏以及  
分佐悉覈其功能或以死勤事或開設城池或招復  
流民或撫綏新集興廢舉墜可紀之績皆䟽上之旌  
賚有差會開科詔下禎豫徵名士以待試嶺海翕然  
望治焉洪武二年冬十一月召爲刑部尚書

顧文昱蘇州嘉定人洪武二年以知州擢廣東行中  
書省右司郎中爲人精廉至於別淑慝均輸納脩城  
隍練士馬恤困苦不遺餘力民懷其惠

華高和州人初與俞通海廖永忠等聚舟師保巢湖



從渡江累官湖廣行省平章政事封廣德侯洪武三年擇熟練水戰總兵循撫廣東高自請行遂命之以往四年巡海南城池還至瓊州卒計聞 上憫其無子以鐵券納之墓中親爲文祭之追封巢國公謚武壯

丁文昇天台人以文學舉洪武四年擢廣東僉事端慤廉介時民訟多不情文昇於司左建亭扁曰三思民有訟者即令造亭坐而思焉由是民訟日少至今美之

汪廣洋字朝宗高郵人少從余闕學通詩書乙未歲上渡江首召諸儒廣洋入見與語大悅歷官中書叅政爲左丞封忠勤伯賜誥有能識真主於草昧之初效勞於多難之際終成功業可謂賢知如張子房諸葛亮等語六年三月左遷廣東行省叅政十三年御史涂節言劉基死於毒廣洋宜知狀廣洋不直言上怒其朋比貶居海南舟至太平復遣勅責問廣洋懼自縊死廣洋寬和有文其爲行省頗多題咏今見五先生集中



韓禎洪武十一年任布政司叅政時展築城池闔帥力欲亟成工役晝夜不休軍民苦病亡禎曰城郭所以保民今築城而民疲甚非安邊保民意也 朝廷聞之各將誰歸帥始懼又欲令五鼓始工二鼓而止禎曰不可乃召衆定約以晨鍾從事夕鍾則已由是赴工者莫不感悅三年政聲大著

花茂巢縣人元末率義兵歸附累功授神策衛指揮僉事洪武庚申調廣州左衛勦平陽春清遠英德博羅諸寇壬戌討岐黎捕倭海上丙寅東莞香山龍川翁源民作亂討平之進指揮同知尋平電白賊戊辰破歸善諸賊己巳連擢廣東都指揮同知子孫世襲廣州左衛指揮使是年平南海香山等寨辛未捕斬連柳廣右徭賊三萬餘人癸酉討東莞筭岡寇平之甲戌疏請徙東莞香山諸縣逋逃蛋戶爲兵復奏增廣海碣石等二十四衛所議於山海要害立營置戍詔從之乙亥討平黎寇明年入覲 上慰獎之召用其次子英會英討番禺山寇有功遂進茂都指揮使授英都指揮僉事踰年茂卒賜葬牛首山廣人于越



秀山祀之英武毅有父風亦歷都指揮使

王綱字性常餘姚人洪武四年以文學徵至年踰七十而神愈壯 上問而異之親策治道拜兵部郎中

十四年潮民弗靖擢廣東叅議往督兵餉綱遺書與家人訣曰吾命盡茲行乎其子彥達請偕往至則單舸往諭潮民感悅咸稽首服罪返至增城遇海寇突至擁舟羅拜願得綱爲帥綱厲聲叱之諭以逆順禍福弗從遂昇去坐綱于壇強之綱怒罵不絕口遂遇害時彥達亦陷賊中哭且罵賊欲并殺之其酋曰父忠而子孝殺之不祥令以羊革裹尸歸

李祥瀘州人洪武中爲按察司副使嶺海訟煩疑罪積獄動逾歲時祥至察問明敏未及月餘囹圄爲空後調雲南副使

趙庸廬州人元季集義兵屯巢湖率舟師從渡江累官同知大都督封南雄侯洪武十四年廣東盜起

上命庸率師討平潮州海陽劇寇擒賊千餘又討平東莞陽山歸善等縣寇賊尋俘其酋鏟平王招降脅從者語在事紀捷聞 詔庸班師至京入見 上慰



廣東通志 卷之三十三  
獎殊至賜彩幣上尊良馬命理西北軍務二十六年  
坐事卒

王溥字士淵桂林人由進上洪武二十六年歷官廣  
東叅議時匠藝之家苦於勢要占役溥禁之有奉部  
檄來徵舵木者立期逼取木多不中民患之溥親閱  
用其八九又以起運由海道風水漂沒自臨庾嶺遍  
觀險易命有司鑿石填澗脩葺橋道教民造車運之  
民賴焉時起無糧無藉軍都司咨取甚亟溥曰國本  
於民今槩取之民何以堪耶遂奏除之止起無藉餘  
皆免及獻績父老遮留不可歷官數年澹如也爲胥  
吏龐庸誣逮赴京行李蕭然寮屬贖之謝曰吾豈患  
難易心耶比至得白歸卒年三十有六廣人惜之  
鄭金字南金蘇州人洪武二十九年任按察使公正  
有守敏於政事臨獄案洞悉情隱人至今思之  
徐竒字以正浦城人監生任都給事中永樂元年擢  
右布政使二年九月奏言公差員役皆令自給無以  
督趨事也妨誤實多乞於所轄遍運曠役悉任應付  
爲便又諸有司卒于官者大爲可憫准律故官家屬



有司應付給與行糧遞送還鄉所以厚死臣也 上  
皆從之以朝覲至京載土物一二以行有得其單目  
以進 上以問大學士楊士奇對曰非厚貨也酬昔  
日贈詩文爲累耳 上卽命燬之一無所問奇蒞職  
能勤持已能廉立志愛民民用戴之六年十月卒于  
官

王伯貞名泰以字行泰和人洪武初以聘應詔試經  
學時務 上親擢爲第一永樂中歷廣東僉事分巡

海康問民疾苦除害興利上疏振寬滯恤孤寡防海  
寇及拯鹽法之弊又言宋寇準於雷州開渠引呂塘  
水灌東洋田萬頃勝國元帥府以兵守閩廉訪掌局  
鑰以時閉泄歲屢有秋今渠淤塘廢東洋田多旱請  
開濬以利民會罷分巡召還後知瓊州府瓊民立祠  
祀之

盛敬字存禮當塗人洪武末以進士授行人聞兄溺  
死陳情奔歸求屍得之哀死撫孤備至尋遷陝西道  
監察御史巡按廣東所至洗冤澤物不事苛細清苦  
自厲廉幹之譽大播嶺海人咸高其行以爲深得憲



體云永樂乙酉復按遼東卒于官民追思之

鄭隆字德隆浮梁人由進士永樂七年擢僉事廉介

有守用刑平恕分巡郡邑民愛之後遷廣西叅議

黃公亮華亭人洪武中以能書舉爲吏科給事中遷

應天府丞永樂九年調廣東右布政使公亮體貌豐

偉儀度閑雅居官簡靜政知大體所至廉重愷悌人

皆悅服十二年卒于官

劉子輔廬陵人永樂十三年擢廣東按察使端謹清

約風裁凜不可犯遷交趾諒江知府黎利來寇城兵

民無一人降者子輔死之

梁觀字大用當塗人以太學生擢吏科給事中永樂

十六年爲廣東按察僉事剛介廉平能振風紀分巡

潮州強寇劉晚等二百餘人嘯聚山澤守衛官將發

兵剿之觀曰民貧不得已爲盜兵之得無誤良善乎

遂傳檄諭以禍福晚等感悟率衆來歸闔境賴安後

卒于潮老稚罔不哀悼肖像配祀韓文公祠

朱鑑字用明晉江人永樂中以鄉薦授蒲圻教諭尋

登進士擢監察御史出按廣東是時文網漸闊吏積



蠹而民俗皆窳鐵  
歛若吏卒和買共  
科若無籍搶奪共  
職訪違犯數人徵  
曰出巡至今傳誦  
萬曆中恤刑廣東  
龔璫南昌人監生  
察獄無冤訟簡刑  
胡槩字元節吉水  
歷官廣東按察使  
紀振揚未幾拜女  
于時  
張琰鄱陽人以掾  
私謁食無兼味  
至輒相戒曰張公  
劉永清荊州石首  
為廣東右布政使  
之不得為歌詠

廣東通志

申

聽

開

之

焉

後

宣

清

人

明

理

授

端

人

公

志

公

公

公

公去任民遮留

張茂樾

收耗例若強民科  
寸無備若管屯濫  
竹不端若司教不  
川至肅然命其錄  
又孫天應舉進士  
列其錄以傳  
不僉事廉謹明斷  
四川按察使  
又有聲宣德元年  
滯在事具片風  
御史以清古稱

廣東參政庭無  
不敢欺旬宣所  
誠服如此

翰林待講出



王清字一寧合肥人世爲濟寧偏指揮慷慨多勇畧  
宣德中嘗奉所部出喜峰至鴛鴦海覘虜累立奇功  
正統元年擢廣東都指揮藤峽蠻叛清往討有功已  
巳同總戎駐軍高涼適廣賊黃蕭養作亂圍攻廣州  
清帥舟師赴援比至阻淺被執投水不死繫詩于衣  
寄歸以死自誓讀者沾襟亡何賊擁清至城下使諭  
降清罵不絕口遂遇害 朝廷憫之贈廕有加清善  
律詩有遺藁集行于世其裔孫化今任廣州衛指揮

彭琬字敏敬安福人永樂戊戌進士以工部主事坐  
謫教諭大學士楊士奇薦授翰林院編脩正統元年  
擢廣東僉事提督學校以成賢化俗爲已任增脩各  
屬州縣黌舍凡書籍缺者求善本刻之琬性剛而貌  
嚴雖燕居無惰容寡慾甘苦動準儒先嶺南士風爲  
之不變擢山西提學副使

彭遠南昌人以鄉貢官淮安知府正統中賜勅旌異  
十一年超擢廣東右布政使涖任廉勤寬和廣民喪  
葬尚浮屠習華侈至有年久不葬者遠下令限以葬  
期而暴露者皆賴爲有藏焉其他仁政類此



楊信民紹興新昌人永樂庚午貢士擢刑科給事中  
正統十一年擢廣東叅議旬宣所至愛恤窮困如保  
赤子正統己巳以劾貪被逮廣人詣闕留之復職  
勅守白羊關廣人復奏賊黃蕭養作亂願得信民還  
廣則寇賊可弭上可其奏晉右僉都御史巡撫廣  
東至廣時賊衆數萬有民走愬者官司疑其爲賊間  
繫之獄信民命出之即押印公據數萬散布四方約  
曰縱爲盜有此據者悉免罪願入城者聽令旣下民  
爭趨城至輒泣下信民發粟賑之時持議者曰縱賊  
入城患生不測各將誰歸信民曰吾獨當之越月餘  
賊衆纔數百人耳一日蕭養率衆欲見于城濠之南  
信民單車出止水次賊曰豈真吾楊父母耶信民下  
車揮左右岸烏紗示之賊衆羅拜信民諭以朝廷恩  
威賊衆欣諾遂令一人饋生鯉一信民受而剖之分  
送諸司賊聞而驚曰此吾誅戮兆也時閉城久疫死  
者衆信民命瘞諸城北郊爲文哭祭之民無不感泣  
者俄而信民以病卒城中哭聲聞數日賊平民請建  
祠祀之後十四年祠成始啓土時獲孤忠大節楷書



石刻於地中人以為異謚曰恭惠

戴弁字士章浮梁人以教職擢兵科給事中正統十二年遷廣東叅政時苗蕭養作亂弁往撫安未幾寇逼城闈遂歸為防禦計至羚羊峽口與賊遇弁艤舟登岸諭之曰我戴叅政也爾輩失所 朝廷命我撫安聽吾言即吾良民何為自取滅亡賊首環視曰公果愛吾儕也麾眾羅拜密護弁歸未幾寇復熾圍廣州城中乏食亟檄知府聶好謙發廩賑之眾心始安復立賞格募死士間道促援兵入城守乃固會叅將武毅駐兵金利都督董興至自京師遂謀刻戰乃斬蕭養於城南仍分兵搗巢穴撫餘黨未閱月悉平捷聞 朝廷勞以羊酒寶鏹金綺襲衣晉右布政使景泰三年丁內艱奪情視事遷左布政使

陳金字汝礪上虞人由進士景泰六年累官左布政使清修簡約為政井如也時方望治甚殷遽丁外艱去民攀留載道

孟鑑字克明博野人宣德癸丑進士任戶科給事中  
正統十四年黃蕭養反事聞擢兵部侍郎巡撫廣東



撫摩勞來散其黨與次年四月剿平廣民戴之

陳員韜字從順臨海人庚戌進士景泰三年遷廣東  
叅政涖官清慎惠及小民時值黃寇標掠之餘賴員  
韜撫摩備至未久擢福建左布政使民至今懷之

王翱字九臯河間益城人登進士歷太子太保左都  
御史景泰中庶東西寇盜擾攘兩鎮將官互相觀望  
不即討捕百姓苦之議置總督而難其人兵部尚書  
于謙謂非翱不可乃命翱往涖鎮剿撫得宜徭徭帖  
服民獲安堵踰年徵為吏部尚書後致仕卒謚忠宣  
翱為人剛毅耿介質直無私每決大事雷行斧斷所  
至人敬憚之時馬昂崔恭列位六卿翱嘗呼其名兩  
人不以為訝要有以服其心矣

馬昂字景高滄州人慷慨有志節以鄉薦歷右都御  
史景泰甲戌代王翱總督兩廣時夷寇猖獗昂至即  
擒其偽將軍周鐵等三人械致闕下懲土酋之跋  
扈厲民者將校不職輒劾罷之兩廣以寧尋平斗洞  
諸寇累遷太子太保兵部尚書

方員字茂規末福人進士景泰四年擢廣東按察使



嚴於持已精於察獄爲民興利祛害若不夙宵者在任九年吏民懷之

徐瑄字子敬嘉定人進士景泰七年巡按廣東廉公有威巡歷所至以廩粟易蔬肉自奉甚約恒渡海駐瓊履險不憚擒治奸貪峒黎悅服歷僉都御史巡撫延綏

盛杲吳江人景泰中以監察御史按廣時年踰弱冠而明習法律老吏見其文牘罔不汗下時龍水賊猖獗杲單騎諭之遂降又劾巡撫侍郎揭稽不法事風采振一時云

熊鍊南昌人天順元年擢廣東叅議廉勤有守時中官採珠合浦地方靡寧民物凋弊鍊與同官朱英協心經畫事得其宜民不知擾郡邑賴焉

葉盛字與中崑山人天順二年以僉都御史巡撫兩廣比至均平徭役痛抑豪右風裁凜然初兩廣守將多以勢位頡頏不相統攝盛請於梧州帥府命征蠻將軍總鎮焉兩廣各設副總兵及叅將分守要害悉從征蠻節制遂檄都督顏虎等協破賊砦八百所擒



斬數百人疏請廣東塩商計塩多寡入粟餉邊公私  
利之廣西進士張某歸省盛薄其人稍踈之張至京  
諧於當路取還改巡撫宣府在鎮四年進禮部侍郎  
尋改吏部左侍郎卒年五十有五 詔賜葬祭謚文  
莊盛平生力行好古清脩苦節爲諫官論事不激不  
隨取人先行檢而後才藝考古辯疑通達時務而於  
世味澹然嘗慕范希文之爲人彭韶亦以希文擬之  
云

劉焯字有融慈谿人登正統進士授兵科都給事中

天順四年擢廣東叅政時潮州以羅劉寧等倡亂焯移  
檄招之不從迺謀會剿敗其黨黑遷之內地民甚感之  
未幾以疾卒歸之日廣人素衣哀送塞塗

陳亶字尚勉漳浦人正統丙辰進士爲吏部考功郎  
中嘗上備邊禦寇策不能用天順四年廣東盜熾廷  
議除亶廣東布政使時 英廟初辟勵精爲治召至  
內殿錫宴而遣之亶至廣密相機宜撫捕互用討平  
新興德慶連州等峒徭賊地方賴之

毛吉字宗吉餘姚人景泰甲戌進士天順五年拜廣



東僉事時城以西流賊殺掠居民殆盡其東幸無事而豪宗大戶武斷吞併吉分巡惠潮悉痛懲之豪右斂迹適程鄉賊餘黨作亂吉督戰擒之又討平雷廉高三郡積寇以平賊功陞本司副使下詔褒之委以邊務時新會告急吉率都指揮焦用指揮孫壁等官軍三千人又得民兵將萬人行至火磴與賊遇戰破之斬首二十餘級乘勝追至雲岫山去賊營十餘里時二鼓乃號召諸將曰賊營後山箐而前畝田左右皆山隴若敗必遁入後山爾等明日兩哨進據後山我以精銳衝其中合擊之賊可盡擒也約黎明進兵是夜昏黑遂至後期不得已三哨齊進賊果敗走後山吉命潘百戶帥精銳千人據賊營賊多遺財物卒競取之賊遽擁衆馳下刺殺潘卒皆自營門湧出賊從後追之遂奔潰吉勒馬揮刃大呼曰力戰無隕衆潰不可禁從吏廖振等勸吉姑避之吉曰吾誓不與此賊俱生言未已賊衆持鎗趨吉吉且罵且戰猶手斬一賊斷其臂力不能支遂被害是日雷雨大作山谷皆震連日陰晦又八日始得吉屍面貌如生昇歸



官吏士民哭者相屬事聞贈吉通議大夫廣東按察使謚忠襄錄其子科爲國子生科後亦舉進士官至按察司副使

韓雍字永熙長洲人正統壬戌進士授監察御史年甫二十左都御史王驥獨器重之有重務或巡大藩輒奏委之所至伸冤抑鋤強梗黜貪殘芳聲大振遷廣東副使少保陳循疏雍才擢僉都御史巡撫江西未幾巡撫大同宣府召爲兵部侍郎成化初被累出爲浙江叅政時兩廣寇弗靖將出師議總督兵部尚書王竑及廷臣無不薦雍者遂拜僉都御史總督兩廣雍會都督趙輔等於南京議兵所向僉謂賊寇廣東宜逐之寇廣西宜困之雍曰不然大藤峽爲賊巢穴舍此而致於賊非計也行抵廣西遣偏師平陽峒諸賊擒其魁磔于市示衆先是指揮某失機數其罪斬之軍威大振乃分兵爲二十五哨各授方畧雍與總兵統中哨先攻脩仁荔浦諸峒克之進次大藤峽衆云峽險且有備不如以大軍圍之俟其自斃雍曰兵貴神速峽周圍六百餘里縱有甲兵數萬豈能斷



賊出入相持日久老師挫銳不如長驅擣其巢穴且遣首將歐信帥師由山北取道與大軍合擊復分兵截其要路時賊於山南列柵甚固滾木礮石標鎗藥弩如雨下雍選壯士用團牌扒山虎等器殊死而進奪其要塞焚其積聚烟焰障天賊遁九層樓懸崖不可進雍督兵破山開路棄馬步戰率軍猿攀而進密遣壯士於絕頂舉砲爲應賊方驚駭諸軍四面夾攻會歐信等亦至俘斬不可勝計餘黨皆降雍曰賊雖降不能保其不叛乃改峽爲斷藤峽徙上隆州於峽內更名武靖司以土官置藤縣千戶所鎮壓之刻石紀功而還捷聞擢左副都御史旋以父喪歸再起爲右都御史鎮兩廣蠻夷震懾以父呼之而不名後與中貴人黃沁相左爲所誣訐乃謝病歸卒謚襄毅雍長身俊偉落落有大節具文武才天下仰之所爲詩文雄邁豪爽人亦莫及

黃鎬閩人由進士成化二年累官廣東叅政下車即往高雷廉撫招夷獠安輯軍民旬宣所至人皆慕之亡何擢浙江按察使官至戶部尚書卒贈太子少保



謚襄敏

張瓚德安孝感人登進士成化二年擢廣東叅政總督糧儲下車詢倉之利病民之情隱斟酌折衷行之宿弊盡革西倉舊汙下糧多腐敗官軍病焉瓚新脩之復葺東倉令民輸者至即納之無留難復建新倉一十二廩鑿池於中以洩積水而儲無腐敗之患民甚德之未幾超擢浙江布政使

王英字孟郁閩人由進士歷廣東叅議廉慎不私清風凜然旬宣所至民蒙其惠成化三年歲大侵英開倉賑卹存活甚衆民咸德之

吳琛直隸繁昌人正統進士累遷至僉都御史巡撫寧夏成化五年冬巡撫廣東辯理冤滯人多賴之尋擢副都御史巡撫湖廣

朱英字時傑郴州桂陽人正統進士累官左副都御史成化十二年總督兩廣聞新會舉人陳獻章賢疏薦于朝獻章出見待以殊禮先是韓雍經畧斷藤峽等地方府藏耗竭英繼之搏節數年府藏頗充有言以羨餘進者英曰王者藏富于郡縣兩廣用兵不常



苟進以希寵則他日餽餉奚從取給乎言者愧而止  
 每有所建白皆務愛民官既崇澹如寒士在督府不  
 以家累自隨惟一老蒼頭而已流民得復業者十五  
 萬家召入為左都御史加太子少保英為人端方儉  
 約清淨簡易一時名卿皆自以為不及比卒廣人莫  
 不哀悼新會陳獻章為之服總

陶魯字自強蔚林人以父成浙江僉事死事蔭景泰

初授新會丞遷知縣有平寇功見新會宦績累進兵備僉

事按察使時高雷廉肇流賊攻掠無完聚魯設方畧

擒斬賊惡奪回虜掠脩築城堡招募義勇諸賊悉平

乃奏立新寧從化龍門縣治又平後山瀧水及潯梧

荔浦府江田州諸盜悉殲之下詔褒勵累官湖廣布

政使仍兼廣東兵備副使轄治廣西蠻寇人呼為三

廣公云陳獻章曾贈詩有指揮戎馬表裏山河之句

蓋多其功也其後嘉靖中命守臣建祠廣州祀其父

子子孫遂家焉

袁道字德純吉水人性剛介清苦力學以氣節自負

成化中以進士歷知宜興太平二縣擢監察御史巡



廣東通志 卷之十三 三百四十字  
按廣東至則斥賦吏搜奸弊藩臬諸司皆凜凜相戒  
政暇請謁陳獻章於嘉會樓經旬不倦尋以疾卒于  
龍川獻章作詩哭之時稱真御史

趙瑋字德用晉江人成化十二年進士爲廣東提學  
僉事教有根本士習丕變未幾卒與羅倫意氣相期  
登厓山有詩責張弘範讀者無不感激

林廷玉字粹夫侯官人占籍平涼成化進士歷廣東  
提學副使廷玉剛果敏達雅以文章自許廣之士人  
樂有所憑依其在諫垣上保治八箴請誅太監梁方

妖僧繼曉風節凜然

彭韶字鳳儀莆田人天順進士成化中遷廣東左布  
政使下車首集父老問民疾苦祛除若去身瘁焉先  
是農民補吏令納堂規韶悉革之內臣歲辦貢物民  
不能堪韶疏言明王不寶遠物廣東民力竭矣鎮守  
內臣以此爲恭不知國本凋傷爲害滋甚市舶太監  
常眷請餘剩六十戶隸舶司以需歲辦貢獻韶疏言  
今日富強不及於昔者蓋害財實多及今愛惜樽節  
猶恐無繼更啓他竇其何以善後願將眷所奏餘戶



暫與一年後皆停罷有詔減其半時薦陳獻章于朝得徵召一時名士皆折節下之劾太監梁芳第錦衣千戶梁海及珠池監丞黃福私採禽鳥騷動雷廉後復應詔陳言條上漸不克終四事忤旨調貴州濱行父老涕泣終刑部尚書卒贈太保謚惠安

秦紘字世纓郟縣人景泰進士初爲南京御史有風裁劾中官降北黃驛丞用薦起歷右都御史弘治二年總制兩廣破岑欽克田州又破海南黎及瀧水賊四年劾總兵安遠侯柳景貪縱不法逮景下獄追贓鉅萬褫其爵景以他事誣紘亦被逮坐免臺諫交章論救尚書王恕極言紘廉直忠信遂起紘南京戶部尚書致仕卒贈少保謚襄毅紘剛毅廉介歷官四十餘年所居僅蔽風雨及卒子孫有貧不能自存者周南字文化縉雲人成化戊戌進士爲監察御史弘治二年按廣獎廉斥貪風紀肅然諸所舉措必詢輿論且有人倫鑑嘗拔黃澤於儔伍中及爲按察使持重得憲體歷右都御史總督兩廣有聲于時

劉大夏字時雍湖廣華容人學先正已存誠少師楊



溥一見奇之天順甲申進士改庶吉士思以勛業自見尋出爲兵部主事弘治三年累遷至廣東右布政使爲政公平先是議城從化累年不就至則擇人授役暮月而成人倚爲重田州泗城亂檄諭之罷嘗道厓山謁大忠祠念宋慈元后陵寢無主泫然曰后與陸張二臣同死國今大忠有祠而慈元不祀於義弗稱因與陳獻章議立廟並列祀典後遷至右都御史總督兩廣軍務士人聞命如嬰兒之望慈母大夏至以節愛爲心時議奏請增置雷廉高肇兵備等官部下其議于督府大夏言廣東增置官員不謂不多矣員冗費煩於民奚賴焉因奏革肇慶撫徭叅政高肇捕盜通判十數員民甚快之先是戍卒爲鎮守總帥私役者千餘至是大夏曉譬之各還所役軍威始伸又戒諭十三村盜平之後召爲兵部尚書以忠直名天下即朝鮮諸夷無不知中國有劉尚書云卒年八十一謚忠宣同時按察僉事徐紘字朝文武進人行部嶺南首重儒術脩張曲江祠周濂溪書院全節之廟亦自此興及輯名臣琬琰嶺海文獻賴以不泯後



廣東通志  
卷之十三  
三十四  
以績最晉副使

王哲字思德吳江人進士監察御史弘治中按廣務持大體先是盧格來巡張弛瑣屑大失民望得哲獨洗冤澤物鋤暴惠良人心始安屬吏有私餽於其家者詰而絀之其無私類此

瞿俊字世用常熟人狀貌偉岸不脩邊幅而性廉潔以進士爲御史按江西風裁赫然弘治四年遷廣東副使備兵海南時黎人出寇掠俊戒約群吏脩軍政諸黎戢不敢犯嘗有勢豪撓法俊治之律已廉不可干以私人以爲矯亢偶出見市箒者呼而入分箒給諸僚有僚素乏清譽倍給之曰君庭多穢僚捉研擲之被傷以覲行有餽以金者亟令持去不且獲罪後以病乞致仕歸家徒壁立有圖書數百卷而已世仰其清介

林同字進卿龍溪人弘治八年擢廣東布政使嘗條示利病二十餘事督郡縣行之復勸民行呂氏鄉約及文公家禮巡按御史王哲奏同廉能第一兩廣總督自韓雍以來藩憲大僚率皆庭叅及唐珣繼至同



廣東通志 卷之十三  
獨不爲屈珣不懌以事挫抑之亡何珣卒其子至廣  
待之踰厚戊午入覲過漳疏乞骸骨許之居官清白  
卒之日家無餘貲云

鄧廷瓚字宗器巴陵人景泰進士弘治九年以右都  
御史總制兩廣政務安靜屬吏賢者舉之不職則汰  
去之嘗奏除諸冗吏曰省祿以養民也群蠻劫掠往  
往出沒閩楚諸郡廷瓚言都御史金澤巡撫偏方非  
宜宜以江西一省付澤使二司聽節制軍馬錢糧可  
以調度其湖廣衡州添兵備憲臣遷治于郴州便又  
以瀧水爲賊巢宜即其地設千戶所調軍守禦仍給  
空地屯田爲久遠計廷瓚於群蠻結以恩信兵不輕  
動動則利鬻林大桂諸崗賊以次蕩平四會諸縣饑  
盜竊發及斬獲首惡李景元等併其黨二百餘人悉  
令解散廷瓚寬中大度人莫窺其際至所設施動中  
機宜卒贈太子少保謚襄敏

宋端義字孔時莆田人年十四即有志正學成化進  
士弘治九年擢廣東僉事提督學政其行部所至必  
較行藝課勤怠雖瘴鄉海澨必親其教人尤必身先



表率而痛抑浮誕奇險之習在廣五年甄別造就士人知所向方辛酉夏以鄉試屆期衝冒炎瘴巡歷南韶諸邑遂染疾卒

周孟中字時可廬陵人成化進士弘治十二年遷廣東左布政性剛毅重名節權璫懾東不敢與抗壬戌入覲銓部旌廉能孟中居第一進副都御史

方良求字壽卿莆田人弘治十四年以進士歷廣東兵備僉事廉明勤幹兵民悅服時調廣右狼兵征儋州賊符南蛇等狼兵所過舊多騷擾良求處置得宜

道路戢然累官刑部尚書謚簡肅

熊繡字汝明寧遠人成化進士歷官右都御史正德元年總制兩廣操勵廉潔自甘蔬布餼廩羨餘不入私室嚴番舶抽稅之禁密保甲偵探之法絕中官饋送之例杜州縣署印之奸風裁振肅未幾召入南臺俄而傳旨致仕家居蕭然饋遺竣却雖家徒四壁意度晏如卒巡撫都御史秦金以聞贈南京刑部尚書逾年太僕少卿何孟春復疏請表勵清賢詔給繡繼子端月米一石謚莊簡



李希顏字原復華亭人沉靜寡言有大度十歲父授以春秋知大義居母喪哀毀踰禮弘治癸丑魁禮闈授南京刑部主事正德初陞廣東僉事署提學獎拔俊又號稱知人以其經學授之廣郡時從化盜作當道以遐阻怯于進兵希顏獨深入平之仍領海舶例有贏餘希顏悉給軍士是時巨寇黎頭拐嘯聚山谷親率兵大戰敗之獲其渠魁當道如其功不為奏賞奉表詣闕時逆瑾勢傾中外希顏獨不踵其門京師稱為鐵腰李庚午遷雲南提學副使

江潮貴溪人正德六年以進士歷提學副使有知人鑑謂蕭與成梁焯金山等必擢上第而魁天下者霍韜也後如其言又嘗謂山曰子文多杜撰如呂申公等語皆誕說也異日居官蒞政子必重戒及山以戶部主事兌糧江西陷宸濠黨敗士人益嚴之曰江公言如左券

余本字子華鄞縣人正德辛未進士及第授翰林編脩出為廣東副使提督學校諸生想望其風采既至敷教以寬大都率先德行士敬而愛之然秉性剛直



不避權勢與巡按毛鳳不協去任七人攀轅載道後  
歷南京通政使卒

吳廷舉字獻臣蒼梧人登進士歷廣東兵備僉事討  
十三村池水諸洞寇悉平之以功進叅議歷瓊州兵  
備副使劾鎮守太監潘忠數十事忠亦訐奏之逮京  
拷掠坐以枉道還鄉械于吏部門外九日死而復甦  
謫戍鴈門放還起江西參政有平桃源賊功擢廣東  
右布政使潔已愛民砥礪名節終工部尚書卒無以  
殮謚清惠

王大用字時行儀真人正德戊辰進士十六年爲  
南兵備副使惠困窮威酋桀平寇盜釋黃圃民民自  
執黠者十六人麗于法其功德在樂昌民爲建祠立  
碑歌曰誣者弗釋不如爲賊民何以白黠者弗摘畢  
竟爲賊民何以息釋之息之是爲公德增城寇起知  
縣朱文簡密告之設法擒獲一邑帖然歷右都御史  
大用甚清苦尚書霍韜在南都乃給廢寺田周之  
汪思字得之婺源人正德丁丑進士選庶吉士授給  
事中擢廣東叅議賦性溫雅於世無忤而內剛正人



莫敢犯權豪有奪人業而強收人女者事發托囑之  
思竟寘于法闔省肅然擢雲南副使致仕卒

程昌字時言初門人正德戊辰進士十六年巡按廣  
東廉潔惠愛風裁肅然憫民徭役有司科歛多勒秤

頭乃立銀力二差等則以抒民困時甚便之代去士  
民攀送者千餘人其感人如此

魏校字子材崑山人弘治乙丑進士正德末為廣東  
提學副使教士先德行設科條嚴黜陟首禁火葬令

民興孝大毀淫祠改公署書院餘建社學訓童蒙分  
肄歌詩習禮演樂僧尼多令還俗男子咸編渡夫其

崇正闢邪之功前此未有也教諸生靜坐潛心日坐  
齋舍著體仁說令學者內省氣象自中達外如春風

之和乃見仁體後以憂去大學士張璁方獻夫薦遷  
國子祭酒所著有六書精蘊訓釋學者稱莊渠先生

卒贈寺卿謚恭簡

歐陽鐸字崇道泰和人正德戊辰進士嘉靖二年歷  
延平知府以治行第一擢廣東副使改督學承魏校

後明禮教崇行義勸督有程子第資稍穎輒收之學



廣東通志 卷之十三  
文義踈劣不即黜再試靡進乃黜之并黜其僮蕩無  
行累教不悛者文體士習爲之一變所獎拔多名士  
考校畢歸豫擬經選如陳思謙唐穆岑萬等無不左  
驗人服其藻鑑擢太常少卿終吏部侍郎致仕卒贈  
工部尚書謚恭肅

梁材字大用順天大城縣人弘治己未進士志甘澹  
泊布素澣補出自天性嘉靖四年爲左布政使首嚴  
門禁凡同僚及首領皆置圓牌書其僕令候吏輪遞  
幣藏出入羨餘一介不取清風穆如每市物必書其  
數牌上會而後入召市人面給之以爲常其吏舍聯  
陌巡覈惟謹內外肅然旦夕皆飯于堂菜食無兼味  
其內亦甘苦茹淡無間言比擢副都御史巡撫江右  
歷官戶部尚書廉介自持慎制國用 上嘗曰諸部  
尚書盡如材朕何憂天下乎材素見知于尚書霍韜  
力引同升故不十年遂陟八座

蘇恩字從仁華亭人嘉靖五年以御史按廣抑權豪  
革和買且與藩臬僉議歲編驛傳爲首者最苦乃定  
隨糧帶征法民甚德之檄廣州知府范祿請編脩黃



廣東通志 卷之三十三 三十一  
相尚通  
佐重脩省郡志垂成以互相糾劾去士民垂泣攀留  
不忍釋

葛浩字天宏上虞人弘治丙辰進士累官廣東左叅  
議豈第愛人每聽斷必持平熟思乃決正德十五年  
新寧盜起撫按具聞議討乃調兵一萬五千分據要  
害浩與叅將李璋軍新寧右布政章拯軍新會知府  
簡沛軍海晏進擊之賊衆大潰多走匿時令有捕獲  
者隨賊所指即馘之濫及商民獨浩用兵有紀多所  
驗出時爲之諺曰大盜起家室棄葛李則生章簡則

死時賊首陸四未得拯即議奏凱浩止之曰蘊崇未  
除終當復發吾與公等戮力兩月賊可盡也柰何遽  
旋師乎不聽亡何賊復爲民擾知縣胡綸用降賊羅  
九計始誘陸四出戮之餘黨乃平督府叙功拯爲上  
浩次之士論譁焉後浩歷廣東右布政使終官大理  
寺卿子木登進士人以爲不濫無辜之報新寧人至  
今稱之

陶諧字世和會稽人弘治丙辰進士選中秘授諫垣  
首疏乞緝熙聖學以裨治道正德初疏戒逸遊斥大



闕丘聚劉瑾輩蠱惑之罪以他事杖諧落職下詔獄  
與尚書劉大夏潘蕃同謫戍肅州嘉靖初起諧僉事  
歷兵部侍郎總制兩廣先是群盜負險弗平諧隨在  
征剿賞罰必信所向克捷前後俘馘萬計陽春民被  
侵者清出復業亦以萬計及奏凱不自以為功以毋  
喪去服闋起為兵部侍郎致仕卒謚襄敏子大臨吏  
部侍郎謚文僖大順副都御史

方豪字思道開化人穎悟博學於書無所不窺登正  
德戊辰進士嘉靖七年為廣東按察僉事職掌屯鹽  
清理得宜毫無所私商戎咸服性好吟咏諸名勝多  
所留題後擢副使尋謝病歸構石屋精舍優游著述  
其中一時名流經其地者必造焉所著有棠陵集傳  
于世

商大節字孟堅安陸州人進士嘉靖中擢廣東按察  
僉事飭兵海北性廉介諳權變南征岐黎其功為多  
擢副使歷右副都御史二十九年以虜變罹法隆慶  
中謚忠愍

程鑒字本虛合肥人世為指揮僉事博涉經史智畧



過人從征新寧賊有功遷指揮同知嘉靖初守備惠潮居碣石衛剿和平賊擇強族十餘輩為鄉長構亭規勸滄俗丕變遇饑饉諭民相濟存活甚眾有司媿焉庚寅遷廣東都指揮僉事尋充左叅將守肇高廉雷四郡西山徭賊黎廣等攻劫府帑事聞總兵仇鸞奪俸鑒帥師馳赴駐于陽春遣聽招賊酋誘而破之巢穴蕩平尋征連州諸砦功不得上且罷歸己亥陵崖黎岐作亂提督蔡經起鑒討之斬首三千六百級功冠諸將捷聞賞賚有加癸巳晉副總兵鎮守廣西

瓊人咸惜其去後喪母歸葬卒年五十三鑒與廣右沈希儀齊名而文學過之所為詩多警語學士黃佐倫以訓輩皆與之唱和所著有雪崖集

熊蘭字天秀南昌人進士以行人選御史宸濠將叛密與蕭淮發其謀濠果反不踰月竟敗嘉靖三年巡按廣東所至旌廉黜貪剛介莫犯嘗讞陳給事獄奪其秩及脫王指揮之死論者謂其矯激出知太平府五日而罷歸

邵幽浙江東陽人正德甲戌進士嘉靖六年以御史



按廣東興利革弊不遺餘力聞西樵石礦奸民擅利  
害及丘隴前巡按兩廣御史屠應坤奏禁而御史徐  
相封禁未力函遂與總制尚書王守仁復申前議請  
明旨嚴禁之 國朝以物料爲貢額辦歲辦之外有  
襍辦焉藩司承部不時之派也歲無常數名色孔多  
部下藩司徵之郡邑敷於里甲小民不能戶知吏胥  
神鬼其間通里役爲奸利前者方輸官而催科吏復  
至民病之函請均一料派以便徵納節民財自九年  
始料俱折價隨糧帶徵其額辦歲辦襍辦名目一切  
除之續派不敷取於贓贖椒木鹽利廣人至今賴焉  
後六年奉化戴璟按廣以有司責民直日供具多至  
破家遂定議爲均平錄吏部侍郎霍韜謂璟曰民壯  
太重廣東民力竭矣璟復奏減歲省十餘萬政暇博  
稽典故編廣東通志公而核爲士林所珍  
周煦字啓化安福人早孤貧力學毋許氏守志教之  
正德辛巳進士爲監察御史巡按廣東持廉秉公貞  
肅百度故事御史至貴倨出則儀從甚都煦獨乘驄  
馬減騶從士民莫不竦敬審獄決囚必以情有嫗謀



殺隣人幼女取其珥值甚輕曰情重安可貸遂處決於積蠹害民者悉廉之逮于法有司貪酷者各繩之無少假未及暮擢大理丞士民攀送之終副都御史家業僅田十數畝其廉介足稱云

邵銳字士抑仁和人正德戊辰禮闈第一登進士累遷廣東右布政使操廉秉公政持大體所至以清謹稱平生耻于近名其學切身心顯微洞徹而不立門戶嘗曰吾願爲真士夫而已士論翕然歸之歷太僕卿卒日筭無餘積田僅百畝贈副都御史謚康僖

李默字時言甌寧人正德辛巳進士歷官廣東僉事默有治才且博覽群籍屏中有大椀樹可蔭畝許暇則著書其下所撰孤樹哀談爲縉紳傳誦尤喜風鑑豫識其隸麥祥必列一品默歷布政使以端毅廉直著聲累官吏部尚書秉正不阿嚴嵩趙文華誣以謗訕下獄雜治之忿恨而卒

毛伯溫字汝厲吉水人正德戊辰進士歷官太子少保兵部尚書兼右都御史安南黎暲被殺莫登庸據其地國大亂久缺朝貢嘉靖十八年上決意討之



命伯溫統兵南征許以便宜至廣發諸省土漢狼達  
兵二十餘萬從廣滇分三道進伯溫知參政翁萬達  
材畧過人遂以事屬之萬達首誅廣右土酋及劇盜  
通安南者復出重賞購斬登庸師次南寧安南大震  
登庸請罪且言黎氏死無後願歸欽州四崗故地世  
奉朝貢伯溫念安南罹罪已久而窮治之非羈縻遠  
夷之道遂定計受降于鎮南關登庸率屬繫頸徒跣  
蒲伏獻降復遣姪莫文明代詣闕下伯溫具疏請從  
之以登庸爲安南都統伯溫進伯溫太子太保班師復  
舉時弊當釐革者八事疏聞尋入掌兵部事未幾卒  
贈少保

張岳字維喬福建惠安人進士授行人直諫左遷歷  
廣西提學謫提舉知廉州府治行爲諸郡最嘉靖甲  
辰累遷副都御史兵部侍郎提督兩廣岳敷歷日久  
溪崗險要伍籍歲餉將吏賢否較然胸中政尚莊肅  
諸文武大吏非檄召不敢入轅門乙巳春封川猺亂  
集諸道兵討平之上首功二千五百有奇又征柳賀  
猺俘馘七千有奇錄前後功晉右都御史卒贈太子



少保謚襄惠

袁載字安道慈谿人進士嘉靖十九年知肇慶府嚴  
慎勤勵節用愛民廢墜脩舉諸不急之費一切蠲去  
惟恐爲民病闔郡德之擢山東按察副使飾兵臨清  
有中官入境橫暴不法載庭柱之入訴幾不免賴學  
士袁煒調護乃解調廣東海南副使遂引疾歸

徐問常州武進人嘉靖進士深沉廉靜三十年爲廣  
東左布政使以治行第一賜宴賞歷官所至有聲始  
終無玷仕至南京戶部尚書

周延字南喬吉水人嘉靖癸未進士令新會有政聲  
召爲兵科給事中去日攀轅者載道歷官兵部侍郎  
提督兩廣至則節冗費杜倖功疏嚴番舶交易罷瓊  
萬烏石諸驛歲省數千金二廣乂安擢南京吏部尚  
書尋改入爲左都御史臺綱肅然卒贈太子太保謚  
簡肅

劉采字汝賢麻城人嘉靖二十九年以進士歷官廣  
東右布政使約已裕民守官肅度數歷三十餘年所  
至以廉能稱而藩務清釐官箴靖穆足爲諸僚表嘗



以家學春秋宗旨授諸生於是廣士學春秋者得其肯綮多所發明歷南京兵部尚書卒贈太子少保謚端簡

黃光昇字明舉晉江人習易得蔡清之傳嘉靖己丑進士究心典籍律例令長興有政聲徵爲刑科給事中以剛直忤時相出爲浙江僉事進叅議歷廣東按察副使廣民與夷市於洋海中互相標掠則爲置符籍以勾稽之嚴踐更以防閑之先是番舶稅重商人欲計免光昇爲制減十之六商乃樂輸且躬自清白錙銖不染而歲盈數萬後罕有能繼其廉者交趾莫正中與宏瀛爭止其酋以兵攻欽州索正中急光昇計挫之斬其二酋乃定已復討連山崖山徭黎獲功督府上其最遷蜀藩叅三載復遷粵按察使以嚴爲治胥史畏若神明新會賊陳文伯倡亂光昇檄兵往援而牒二兵憲夾攻之俘其當甚衆獲一緋袍者於群屍中衆謂文伯也光昇以狄武襄事止之聲績益著歷刑部尚書卒贈太子少保謚恭肅

柳英字子鍾四川巫山人丰姿奇秀嘉靖三十六年



擢廣東布政使入境行李蕭然惟一蒼頭自隨數月  
與時牴牾即拂衣去粵中稱廉介必曰柳布政云後  
以薦起歷光祿寺卿

孫永思字性孝蒲州人嘉靖庚戌進士歷御史巡按  
廣東貌頎偉莊重寡言笑間語必中利弊諸司爲竦  
聽焉至比邑孝肅粵僻南徼仕者多漁獵其民永思  
据三尺率屬以廉墨吏慄慄恒望風改轍監乙卯鄉  
試所拔多名士尤博雅能賦嘗撰粵臺十二詠清楚  
悲壯世傳誦之

丁以忠字崇義南昌人嘉靖戊戌進士歷廣東按察  
使慷慨洞達有用世才總憲務持大體多平反出枉  
者數十人時佛朗機夷違禁潛住南澳海道副使汪  
栢受重賂從吏之以忠曰此必爲東粵他日憂力爭  
弗得尋擢右布政使時征何亞八鄭宗興諸賊運籌  
裕餉克成厥功賜白金文綺採珠中貴事竣橫索以  
大義諭止之官至南京兵部侍郎

王國楨字以寧浙之山陰人幼倣儻負大志嘉靖丁  
酉舉于鄉登戊戌進士授行人歷都諫毅然以經世



爲已責劾本兵大臣徇私廢法直聲動天下時嚴嵩煽權諸所論列侃侃與嵩左於是出爲廣東叅政分守嶺西至則與督府談愷議征大羅山寇直擣其穴執馘二千有奇民賴寧宇其於綏拊之術保釐之政務殫厥心頌聲載道肇人立祠於綏水上與督府談愷王鈞及同知呂天恩並祀歷官福建左布政使其子孫多登科第云

蔡克廉字道鄉晉江人少與梁懷仁並稱神童弱冠舉進士歷廣東提學副使教規嚴肅藻鑒精明已酉秋試所首擢者中式四十餘人後多爲名臣

潘季馴歸安人進士嘉靖戊午以御史按廣東風裁大著懲貪吏除積惡解煩役定均平百姓懷其惠比代去遮道留之祀于郡學西偏歷右都御史

陳道基同安人進士歷廣東御史威明惠下激濁揚清詰奸剔蠹道路肅然柘林兵變闔者拒城士女蹂死城外道基親門焉開納之多全活民爲立祠

吳桂芳字子實新建人嘉靖甲辰進士歷官叅政分守嶺西以作養人才爲已任擇士館穀于崧臺書院



躬課之克諸戎兵羅旁徭寇無敢出嘯者四十三年以兵部侍郎提督兩廣時興寧賊葉丹樓花腰蜂等勾引倭賊焚掠爲害桂芳甫蒞任帥師東向亟討之前後俘斬二千四百有奇未幾柘林海兵稱亂揚帆直抵會城桂芳陽令招之隨調東莞南頭兵自外洋入總兵叅遊等兵自惠陽趣東洲南出合擊大敗之生擒六百有奇斬馘無算桂芳以粵城西南商民輳集近海無障議築外城自東徂西防禦嚴密海賊曾一本入犯民恃無恐粵人思保障功立祠祀之

熊桴字元乘武昌人進士隆慶戊辰以僉都御史巡撫廣東時海寇曾一本作亂至則條平寇四策乞餉金五萬皆得請行保甲團練法興師平新會藤洞諸盜尋破一本於潮一本遂誘倭寇惠州把總周雲翔殺叅將耿宗元以叛先是鄉縉紳有謂名色把總不可用者桴不聽及雲翔叛愧恨而卒贈副都御史熊汝達進賢人爲廣東布政權僉都御史繼能桴巡撫剛方廉介果于革弊桴所悞用把總害民者亟杖殺之士民稱快亡何裁巡撫改操江汝達威惠並施



自奉儉約不可以私干終官右都御史

郭應聘莆田人嘉靖末為廣東叅政歷廣西巡撫萬曆癸未晉右都御史總制兩廣會安南侵下雷歸順土酋界應聘諭以利害乃上表請罪悉還所侵界東山營卒亂丐降應聘戮其元兇他釋不問覽東事慨然曰措兵朘民我實生亂乃作旌廉杜覬功令頒誠所部諸將吏廩廩毋敢操一幣詣制府者粵故瀕海時有二夷舶以通販至澳守者將掩為功獻所俘三百人鞫驗無他悉縱之又汰冗役蠲津澳諸稅民感其德歷官南京兵部尚書

吳文華連江人嘉靖進士萬曆十二年由廣西巡撫總督兩廣文華廉潔嚴重在鎮三年文武將吏無敢載金帛至者南門之征有山稅又有物稅重差次減之即私養錢置不用藏肇慶梧州兩府至數萬比去買象擲十而已其為治持大體務與民休息嘗作殘墨二戒以訓官屬幕府肅然曾討平府江懷賀盜斬首一千八百人服其威丙戌珠池之役無賴子弟聚至數萬聲勢甚張文華弟移鎮廣州命將陳師海上



以懾之下令有司諭其父兄自令解散沒其巨艘三百餘戮其二三渠首而已先是乙酉東營悍卒以罪被執遂大鼓譟挾主將抗有司後事雖寢文華曰此廣州腸胃之疾也激之則生亂吾當密除之乃調操于端州防汛于南頭以分其勢比閱操廣州潛得其首惡數人以犯令戮之三軍股栗心知其討前罪也其威惠並設如此肇慶大水蕩民居產文華乘城望咨嗟歎息計安生養請減明年田租擢去而民思之祠于學宮左歷官南京兵部尚書

吳善字元夫龍溪人嘉靖進士初授刑部主事恤刑東廣廣人連年旱魃盜獄繁興善多所平反一時稱平萬曆中巡撫廣西丁亥拜兵部侍郎總督兩廣下車首禁屠牛賑恤荒歉又清虛糧補曠餉廉適賦核僧田凡苛條悉從報罷而責成吏治意尤蒸蒸切也海南討黎之議與諸司叅發其端力疾運籌終不以病爲解故事兵餉歲羨數千隨幕府出入不問銖毫悉登官籍其廉靖如此卒于署計 聞贈右都御史祭葬如例蔭子廷覲爲國子生郡士民思其功德請



合祀於吳桂芳祠云

蕭彥字思學涇縣人隆慶辛未進士萬曆十九年以左副都御史總督兩廣軍務性廉潔自奉儉約目擊民艱奏請蠲賦而獻梧稅六千以資國計殫慮邊防籌畫周悉以虎門爲會省喉咽海寇出沒其間乃增置重戍集樓船密桴鼓邊徼安枕彥之力也嘗捐俸七百修肇慶學及崧臺書院又捐金二千改建高要學光祿卿郭棊爲之記復作養十郡士親校其文厚餼之卒于官士林悼惜

史朝宜字直之晉江人幼與兄朝賓同學凡書冊閱成誦登嘉靖癸丑進士歷瓊州知府治行爲一時最尋擢廣東副使視學備兵綽有聲績亡何晉憲使威信在民綱紀整肅平反大獄曲爲詳慎至懲墨貪不少假借入覲首舉卓異轉湖廣右布政使清苦如初任未數月引疾歸

論曰漢人有言泰山高百卉植民何貴貴有德此言位高者人具瞻而德其本務也故政於天地與有立焉而民司其券孰得孰失嚴於陽秋然後舉



權衡而遺諸典記者得以竊司其袞鉞余獨慨夫  
南交分宅而後豈無統轄何其寂寥而亡綴也迨  
于東南一尉肇自任囂而因時制治之臣始顯至  
于今斌斌盛矣世儒譚粵故又謂掌握百城主爵  
者非計期歷必選物望故多明習儁爽之材惟是  
粵地僻遠禁罔故稱踈闊風氣漸靡斯或以黷隕  
名竊未然之心不易地彼地豈能易心試觀

明興以來所傳述羣公要皆位高而行仁義者爲  
有德故率屬而標準立勤民而惠澤流造士而教  
思顯安內攘外世用輯寧彼非憑軾而入粵疆者  
耶何章章較著也故曰人貌榮名豈有既乎君子  
不貴近名至于聲實之際未嘗不自考鏡焉其全  
傳率採諸史餘則本民心而第紀粵政者居多章  
往察來或將有取云爾

廣東通志卷之十三



思賢堂

名宦四

理學

嘗謂理學有關於世運粵宦自宋周濂溪明刑嶺  
左而正學始行羅仲素靜居羅浮而所養益邃此  
兩人者實開吾粵理學之先及我

明治化淪濡理學不顯若陳方伯選以真知實踐爲  
功張藩使吉以深契妙悟爲指王制府守仁以致  
良知爲教鄒汝愚智以體驗爲宗近則李同野涓  
以求仁爲要皆孔門之正傳而吏治之明鑑也直  
指方麓李公深有得於同野求仁之指歆推斯學



以仁吾粵之人其有關於世運非謗故於名宦作  
理學傳

宋周惇頤字茂叔道州營道人元名惇實以舅學士  
鄭向任爲分寧主簿熙寧元年爲廣東轉運判官提  
點刑獄洗冤澤物不憚勞苦雖瘴險遠亦緩視徐按  
自韶至惠登羅浮賦詩後知南康軍家廬山前有溪  
合於湓江取營道所居濂溪以名趙閱道杵異其才  
執其手曰吾今乃知周茂叔也歆奏用之未及而卒  
年五十七所著太極圖明天理之根源究萬物之終

始又著通書發明太極之蘊皆孔孟正脉黃庭堅稱  
其胸次灑落如光風霽月程珦視其氣貌非常人與  
語知其見道使二子頤頤受業每令尋孔顏樂處所  
樂何事頤嘗言自再見周茂叔後吟風弄月以歸有  
吾與點也之意嘉定十三年賜謚曰元淳祐元年封  
汝南伯從祀孔子廟庭

羅從彥字仲素閩沙縣人紹興初以特科授博羅主  
簿嘗於羅浮山澄心靜坐窮天地萬物之理以及古  
今事變之歸又嘗往來廣州士人多從之遊其語學



者靜中看喜怒哀樂未發氣象尤爲所自得者乙卯卒于官士人哭之慟罷市三日其政之感人如此後友人羅友爲惠州遣人護其喪以歸從彥深于治道每言曰君子進則常有亂世之言使人主多憂而善心生小人進則常有治世之言使人主多樂而怠心生其論士行曰士之立朝以正直忠厚爲本朱熹謂楊時倡道東南士之任重詣極者仲素一人而已

**明陳選**字士賢臨海人明禮經天順庚辰試禮部學士丘濬讀其文喜曰此必古君子也力置第一及相見而貌少不揚濬益喜曰吾聞聖賢無相荀卿子豈欺我者後爲御史所至有聲累遷廣東左布政雅澹無異韋布每飯蔬羹未嘗腴食率以爲嘗事涉風教必捐俸爲之務化民日使瞽者振鐸徇于道路擇鄉祭酒衣襃衣以教其子弟其聽訟不事刑威隸人俱令業巾帽列左右而曰吾以閑其心也與訟者約自持一票詣被告家使自詣官民樂其不擾皆不忍欺時用兵後民苦徭役爲除之及罷和買備賑濟爲惠養計數辨冤獄閩之漁人賴克哥等三十餘風舟泊



潮邏者得之以通番論死選讞出之又辯邑人劉馬住及黃福等十九人被誣狀人服其神執法不避中貴時提督市舶司常眷倚進貢為奸利以苦役戶選特為裁減其後番人馬力麻與海商通販詭稱蘇門答刺國使臣眷受其賄不問選發其偽又撒馬兒罕使臣怕六灣以獅子入貢浮海還國復以更市獅子啖我選言不貴遠物豈以隳國體而令外夷見也中貴既以抑減後戶生憾至是心益啣之乃誣奏他事命刑部員外李行會巡按御史勘問無實仍用眷意

指賂選所黜吏張聚誣証其狀拷掠務文致之逮選赴京廣人擁留數千至有泣下者選在道病作行至南昌卒後以張聚疏奏白狀得贈光祿寺卿謚恭愍而眷竟罷鎮守選性約素其學以古人為宗至於臨利害賁育不能奪也其治行至今為嶺南之冠云

張聚

南海人性慷慨多大節少時屈首受書久不得意乃棄去署籍藩掾事左布政陳選偶以註誤冒法被黜乃歎曰是吾罪也久之選以抗節觸怒中貴韋眷有旨逮問時勘官李行媚眷以聚必憾選賂之不可乃連逮之拷掠數百終不服遂文致其罪繫累同選赴京行至南昌選病篤李行不為醫療幸選死以報眷聚益發憤欲絕顧念選之所以得白者徒以有口在也乃上疏曰臣聞周公元聖而四國之謗乃致上疑



於其君魯參大賢而三至之言不免搖惑於其母是豈成王之不明參母之不親哉凡以口能鑠金而毀能銷骨也 陛下臨御區宇明並日月恩同父母詎圖忙冒之中尚罹屈抑覆盆之下復有沉寃竊見廣東布政使陳選素崇正學夙抱孤忠才處群邪之間獨立衆憮之地太監韋眷通番敗露知縣高瑤按法持之陳選移文嘉獎以激貪懦固監司之體也奈何宋旻徐同愛怯勢保姦首鼠兩覲以致常眷橫行胃臆穢蟻清節熒惑 聖明勘官李行承眷順指鍛鍊成獄竟無左驗臣本小吏以詰誤觸法為選罷黜寔臣自取非選有加於臣也眷乃妄意臣必憾選以厚賄啗臣令扶同陷選臣雖胥徒亦知廉耻安敢欺昧心術顛倒是非眷既知臣不可利誘乃嗾行等逮臣於理彌日拷掠身無完膚臣其死籲天終無異口行等乃依傍眷語文致其詞劾選勘災不實擅便發倉曲蔽屬官意圖報謝是毀共姜為夏姬詎夷齊為盜跖也本年嶺外地震水溢漂民廬舍屬郡交牒報災老弱張口待哺而撫按藩臬若罔聞知選獨抱隱憂食

不下咽謂展轉行勘則民命垂絕其何能待所以便宜議賑志在救民非有他也選素剛正不堪屈辱為勘官凌侮憤懣成疾旬日而殞李行幸其就死不為醫療又潛遣養子密以選死報眷以快其忿小人佞毒交結權倖一至於斯司寇之屬要在詰奸刑恭安取此輩為也夫選砥節奉公橫罹讒構君門萬里孰諒其冤臣以罪人擯斥田野秉耒自給百無所圖敢冒死披陳其心弔鑊者誠痛忠廉之士街屈抑之冤長讒佞之奸為 聖明之累也奏入 上為感動事遂釋復選爵論者謂張褰小胥也為法受過既以賢矣而白陳公之寃雖貫高之義何加焉常眷刑餘無足比數而李行非衣冠而犬豕者乎狐鼠深穴相與比周自昔而然非果斷烏能勝哉

張吉字克脩餘干人生有美質少從學見諸生各治一經嘆曰士當兼治五經盡購而讀之久之有得喟



然曰道在是矣成化辛丑舉進士除工部主事呈變  
上疏貶景東通判歷肇慶府同知作慎獨窮理改過  
求仁四箴書之座右時陳獻章講學吉往還與之議  
論相孚辛未都御史秦紘為柳總兵所誣逮赴詔獄  
吉上疏代辨秦卒得白人服其見義之勇壬子進表  
入京庭謁吏部尚書王恕雅知其名欲處以提學之  
任不果尋轉梧州府知府歷廣西貴州布政使吉居  
嘗無可喜可怒之事及變入故之來利害之際則惟義  
是從楊廉列於理學而然見之曰五經四書深契奧妙

呂陸是攻各礮其竅蓋宜具際語也

王守仁字伯安餘姚人父華成化辛丑及第第一守  
仁生有異徵己未會試第三名廷試二甲六名會星  
變陳言邊務八事言多剴切庚申授刑部主事歷官  
南贛都御史定宸濠之亂封新建伯閑住嘉靖六年  
起為都御史總督兩廣甯務時田州土目盧蘇王受  
構亂陷思明恩守仁盡撤諸路之兵意務招徠蘇  
受請轄門降廣東諸路兵皆撤一方晏然是年復討  
平八寨斷藤峽等蠻乃任鎮東省會城講明聖學首



言知行合一知是行的意主行是知的工夫知是行之始行實知之終只說一個知已有行在今人將知行分作兩件以爲必先知了然後能行待知得真了方去做行的工夫故遂終身不行亦遂終身不知是以說知行合一正是對病的藥又言朱陸之異同晚年定論乃其所以爲同也又言學莫先於致良知致而行即至故格物是誠意工夫明善是誠身工夫窮理是盡性工夫道問學是尊德性工夫博文是約禮工夫惟精是惟一工夫其見道之大如此其泉湛

元明往還議論守仁稱爲聖人之徒方獻夫何鰲諸人皆師事之其功業文章儘足名世而學頗入於了心圓明之旨卒謚文成萬曆初從祀孔子廟庭

鄒智字汝愚四川合州人生而穎敏十二歲能文章經史一目不忘居龍泉菴三年貧苦自勵蓄樹葉以照讀書登成化丁未進士第是冬星變抗章言事極論陰陽之理且欲黜萬安劉吉尹直而用王竑王恕彭韶曰君子所以不進小人所以不退大抵宦官有以陰主之也疏入不報已酉言事者誣其與劉槩湯



鼎妄言朝政左遷廣東石城吏目毅然就道其辭朝  
詩有曰盡披肝膽知何日望見冠裳只此時但願太  
平無一事孤臣萬死更何悲直寫其慷慨忠愛之意  
既抵石城視事兩月庶政悉舉當道禮重之總督秦  
紘檄至廣城脩書白沙陳獻章忘年而友之得聞自  
然之指向往益切居無何得暴疾卒獻章稱爲豪傑  
之士

李渭字湜之貴州思南籍咸寧人而穎異少從父  
遊蔣道林之門即志于道年十四五坐一小樓時或  
箕踞其父教以毋不敬即書毋不敬四字于壁以後  
漸有檢束居常未免有妄思父教以思無邪即書思  
無邪于壁而心思覺有收拾自後又作一介不取不  
予工夫以求入門真是一介不敢妄取一言不敢妄  
語一事不敢妄爲以印証於蔣道林道林曰此亦是  
硜硜然小人渭因翻然悔悟自後漸覺開擴乃知聖  
學以求仁爲要後領鄉薦入南監肄業耿楚侗定向  
與諸同志多稱異之嘉靖中以工部郎歷知韶州府  
有政聲操持廉介滿考擢廣東按察司副使政體寬



平守官清慎暇則與僚友及諸生講明正學所居毋意軒刻必爲聖人四字扁于堂以自勵仍印刷之凡從講席者人給一紙以堅希聖之志士人翕然宗之所著先行錄十卷同郡孫淮海應鰲廬陵鄒南臯元標序之傳于世

論曰楊蕪作理學名臣錄凡十五人而宦于粵者陳士賢張克脩王伯安鄒汝愚凡四人何其盛與或言太史遷不傳理學何反理之評也史遷嘗作孔子世家矣嘗作七十子列傳矣又作孟軻傳矣理學孰大于是是學不可一日不講而爲政者亦不可一日不知學也











